



কৃতিবাসী সপ্তকাণ্ড রামায়ণ

অযোধ্যাকাণ্ড

শ্রীরামচন্দ্রের রাজা হইবার প্রস্তাব ।

দ্বিতীয় অযোধ্যাকাণ্ড শুন সর্বজন ।
 কৈকেয়ীর বাক্যে রাম যাইবেন বন ॥
 বৃদ্ধ রাজা দশরথ শিরে শুভ্র কেশ ।
 আসন বসন শুভ্র শুভ্র সর্ববেশ ॥
 রাজত্ব করেন রাজা বসি সিংহাসনে ।
 আসিল সকল রাজা রাজসম্ভাষণে ॥
 হস্তী ঘোড়া নানা রত্ন নানা আভরণ ।
 বিবাহ-যোঁতুক রামে দেন রাজগণ ॥
 নমস্কার করি বলে যোড় করি হাত ;—
 মহারাজ দশরথ ! তুমি লোকনাথ ॥
 এক নিবেদন করি শুন নৃপবর ।
 শ্রীরামেরে রাজা কর সর্বগুণাকর ॥
 বালক শ্রীরাম চুলে পঞ্চকুঁটি ধরে ।
 মারীচ রাক্ষস পলাইল যঁার ডরে ॥
 রামতুল্য বীর আর নাহি ত্রিভুবনে ।
 রাম রাজা হইলে আনন্দ সর্বজনে ॥
 অন্তরে সানন্দ রাজা শুনিয়া বচন ।
 বাক্যচ্ছলে বৃকে রাজা সবার মন ॥
 শ্রীরাম হইলে রাজা সবার সম্ভাষণ ।
 বৃদ্ধকালে আমি করিলাম কিবা দোষ ॥
 পুত্রবৎ পালি প্রজা ছুঁষ্টের শাসন ।
 মোরে রাজ্যচ্যুত কর কেন অকারণ ॥
 আনন্দিত অন্তরে বাহিরে ওষ্ঠ চাপে ।
 ভূপতির কোপ দেখি সর্বরাজা কাঁদে ॥

সবারে ভয় দেখি দশরথ কয় ।
 পরিহাস করিলাম না করিহ ভয় ॥
 বশিষ্ঠেরে ডাকি আনি কুলপুবোহিত ।
 রামে রাজা কর সবে হয়ে হরষিত ॥
 ভূপতির অমুক্তা পাইয়া সর্বজন ।
 করিল সকলে তাঁর চরণ-বন্দন ॥
 ভূপতি বলেন শুন পাত্র-মিত্রগণ !
 রামে রাজা করিব করহ আয়োজন ॥
 নানা পুষ্প বিকাশ বসন্ত চৈত্র মাস ।
 রাম কালি রাজা হবে আজি অধিবাস ॥
 অধিবাস করিতে যতেক দ্রব্য লাগে ।
 সে সকল দ্রব্য আহরণ কর আগে ॥
 শ্রীরামের অধিবাসে যত দ্রব্য চাই ।
 সে সকল আনি দেহ বশিষ্ঠের ঠাই ॥
 স্মৃদ্ধ সারথি ! তুমি চলহ সত্বর ।
 রথে করি আন রামে আমার গোচর ॥
 আজ্ঞা পেয়ে স্মৃদ্ধ চলিল শীঘ্রগতি ।
 শ্রীরামেরে আনিল যেখানে মহীপতি ॥
 কতদূরে রথ হৈতে উতরিল রাম ।
 পিতার চরণে পড়ি করিল প্রণাম ॥
 আশীর্বাদ করিলেন রাজা শ্রীরামেরে ।
 সিংহাসনে বসাইল হরিষ অন্তরে ॥
 পিতা-পুত্রে বসিলেন সিংহাসনোপরে ।
 পাত্র মিত্র সকলে বেষ্টিত নৃপবরে ॥
 নক্ষত্রে বেষ্টিত যেন পূর্ণ শশধর ।
 সেইমত শোভিত হইল রঘুবর ॥

পুত্রেরে শিখান বিজ্ঞা সভা বিজ্ঞমান ।
 রাজনীতি ধর্ম আর বিবিধ বিধান ॥
 প্রথমা রাণীর তুমি প্রথম নন্দন ।
 ভূপতি হইয়া কর প্রজ্ঞার পালন ॥
 লোকের আদেশ তুমি শুনিও যতনে ।
 তোমার মহিমা যেন সর্বত্র বাখানে ॥
 রাজনীতি ধর্ম তুমি শিখ সাবধানে ।
 যাহাতে মহিমা যশ বাড়ে দিনে দিনে ॥
 পরের দেখহ যদি পরমা সুন্দরী ।
 না দেখিও সে সবারে উর্দ্ধদৃষ্টি করি ॥
 রাজ্য যদি পরদার করে ব্যবহার ।
 আপনি সে মজে পাপে মজায় সংসার ॥
 পরহিংসা পরপীড়া না করিবে মনে ।
 কভু না করিও রাম লোভ পরধনে ॥
 শরণ লইলে শত্রু করো পরিত্রাণ ।
 অপরাধ বিনা কারো না লইও প্রাণ ॥
 তপ জপ ধর্মকর্ম করিবে বিহিত ।
 না হইও দেব-দ্বিজে ভক্তিতে রহিত ॥
 যজ্ঞাদিতে নানা যশ বরিবে সঞ্চয় ।
 সর্বলোকে দয়ালু হইও সদাশয় ॥
 পরদার পরপীড়া করে যেই জন ।
 শাস্ত্র অনুসারে তারে করিও শাসন ॥
 অপরাধমত দণ্ড করো সাবধানে ।
 দোষ নাহি রাজ্যের সে শাস্ত্রের বিধানে ॥
 দরিদ্র অনাথ, রাম ! যদি কেহ হয় ।
 তাহারে পালিলে পুণ্য সর্বশাস্ত্রে কয় ॥
 দেব-গুরু-ব্রাহ্মণে তুষ্টিও ভক্তিমনে ।
 দেখ সর্বলোকে যেন দুঃখ নাহি জানে ॥
 রাজনীতি ধর্ম রাজ্য শিখান রামেরে ।
 শুনিয়া কৌশল্যা রাণী হরিষ অন্তরে ॥

রামের কল্যাণে রাণী করে নানা দান ।
 স্বর্ণ রৌপ্য অন্ন বস্ত্র সহস্র-প্রমাণ ॥
 মুনি ব্রহ্মচারী যত ভট্ট বিপ্রগণ ।
 সবাকারে দেন রাণী নানাবিধ ধন ॥
 যত যত লোক আছে যত যত স্থানে ।
 সবারে আনিয়া রাণী ভোষে নানা ধনে ॥
 আসিল যতেক লোক রাজ-বিজ্ঞমানে ।
 রামচন্দ্র রাজ্য হবে শুনি ভাগ্য মানে ॥
 যত যত লোক আছে অযোধ্যানগরে ।
 রামের নিকটে যায় হরিষ অন্তরে ॥
 সমাদরে সকলেরে করিয়া সম্মান ।
 জননী-দর্শনে রাম করেন প্রয়াণ ॥

—
 রামচন্দ্রের রাজ্য হওনোদযোগ ও অধিবাস ।
 সুখেতে বঞ্চিয়া রাত্রি উদিত অরুণে ।
 আনন্দে গেলেন রাম পিতৃসম্ভাষণে ॥
 ভক্তিভাবে পিতার বন্দন শ্রীচরণ ।
 রামেরে কহিল রাজ্য শুভাশীর্বচন ॥
 সিংহাসনে বসাইল রাজ্য শ্রীরামেরে ।
 পিতা পুত্র উভয়ের আনন্দ অন্তরে ॥
 রাজ্য বলিলেন, রাম ! কর অবধান ।
 যতকর্ম করিয়াছি কহি তব স্থান ॥
 যজ্ঞ করি তুমিলাম যত দেবগণে ।
 তুমিলাম পিতৃলোক শ্রাদ্ধ ও তর্পণে ॥
 রাজ্য হয়ে করিলাম লোকের পালন ।
 তোমা হেন পুত্র পাই যজ্ঞের কারণ ॥
 পালিলাম রাজনীতি ধর্ম আনিবার ।
 তোমারে করিব রাজ্য ভাবিয়াছি সার ॥
 বৃদ্ধ হৈমু এবে আমি মরিব কখন ।
 তোমারে করিব রাজ্য পাল সর্বজন ॥

আজি হতে তোমাতে দিলাম রাজ্যভার ।
 স্বপক্ষ পালন কর বিপক্ষ সংহার ॥
 কিন্তু আজি কুস্বপন দেখেছি উৎপাত ।
 আকাশ হইতে ভূমে পড়ে উৎপাত ॥
 পূর্ণিমায়ে চন্দ্রগ্রাস শাস্ত্রের বিহিত ।
 দেখি অমাবস্যায় এ অতি বিপরীত ॥
 এ সব জঞ্জাল আমি দেখিছু স্বপনে ।
 গন্ধর্বেশ্বর পৃষ্ঠে চড়ি গেলাম দক্ষিণে ॥
 কুস্বপ্ন দেখিছু আজি নিকট মরণ ।
 তুমি রাজা হও তবে সফল জীবন ॥
 কনিষ্ঠ ভরত তার না জানি আশয় ।
 তারে রাজ্য দিতে কভু উপযুক্ত নয় ॥
 জ্যেষ্ঠ সত্ত্বে কনিষ্ঠের নাহি অধিকার ।
 তুমি রাজা হও রাম ! কর অঙ্গীকার ।
 কত শত্রু শত্রু তব আছে কত স্থানে ।
 কেবা শত্রু কেবা মিত্র কেবা তাহা জানে ?
 আমি বিচুমানের ধর ছত্র নব দণ্ড ।
 কি জানি আসিয়া কেহ হয় বা পায়ণ্ড ॥
 আজি অধিবাস পুনর্কবু নক্ষত্র ।
 পুষ্যা কল্যা হইবে ধরিবারে দণ্ডছত্র ॥
 এতেক বলিয়া রামে দিলেন বিদায় ।
 অস্ত্রপূরে রামচন্দ্র গেলেন তথায় ॥
 বসেছেন কোশল্যা বেষ্টিত সখীবৃন্দে ।
 সাত শত রাণী তথা আছেন আনন্দে ॥
 দেবপূজা করে রাণী নানা উপহারে ।
 হেনকালে শ্রীরাম গেলেন তথাকারে ॥
 রামেরে দেখেন রাণী সহস্র বদন ।
 মায়ের চরণে রাম করেন বন্দন ॥
 মায়ের সম্মুখে দাঁড়াইয়া রঘুনাথ ।
 কহেন সকল কথা করি ষোড়হাত ;—

আমারে দিলেন পিতা সর্ব্ব রাজ্যখণ্ড ।
 আজি অধিবাস কালি পাব ছত্রদণ্ড ॥
 আমা রাজা করিতে সবার অভিলাষ ।
 শুভবার্তা কহিতে আসিছু তব পাশ ॥
 নানা উপহারে মাতা ! কর ইষ্টপূজা ।
 মম প্রতি তুষ্টা যেন হন দশভূজা ॥
 এতেক শুনিয়া রাণী হরষিত মন ।
 রামের কল্যাণ করিলেন অগণন ॥
 কোশল্যা বলেন, রাম ! হও চিরজীব ।
 তোমার সহায় হোন পার্ব্বতী ও শিব ॥
 অনেক কঠোরে আমি পূজিয়া শঙ্করে ।
 তোমা হেন পুত্র রাম ! ধরিছু উদরে ॥
 শুভক্ষণে জন্ম নিলে আমার ভবনে ।
 রাজমাতা হইলাম তোমার কারণে ॥
 সুমিত্রা সপত্নী সে আমাতে অনুরক্ত ।
 তার পুত্র লক্ষ্মণ তোমার বড় ভক্ত ॥
 তোমার কুশল সে যে চাহে অক্ষুণ্ণ ।
 অতি হিতকারী তব সুমিত্রানন্দন ॥
 এতেক কোশল্যাদেবী কহিলেন কথা ।
 হেনকালে শ্রীলক্ষ্মণ আইলেন তথা ॥
 লক্ষ্মণেরে দেখিয়া হাসেন রঘুনাথ ।
 কোশল্যারে বন্দন লক্ষ্মণ ষোড়হাত ॥
 লক্ষ্মণেরে প্রেমভরে দিয়া রাম কোল ।
 সহস্র-বদনে রাম বলে মিষ্ট বোল ॥
 মম ভক্ত ভাই তুমি পরম সুধীর ।
 তুমি আমি ভিন্ন নহি, একই শরীর ॥
 আমার হিতৈষী তুমি, যদি পাই রাজ্য ।
 উভয়েতে মিলিয়া করিব রাজকার্য ॥
 এতেক বলিয়া রাম হইল বিদায় ।
 আশীর্ব্বাদ করিল সকল রাণী তায় ॥

গেলেন পিতার কাছে শ্রীরাম-লক্ষণ ।
 রাজা বলে, রাম এল হ'ল শুভক্ষণ ॥
 বিশিষ্ঠ নারদ আদি আসিল সে স্থানে ।
 আজ্ঞা পেয়ে আয়োজন করে সর্বজনে ॥
 নিমন্ত্রণ করিয়া আনিল রাজগণ ।
 রাম রাজা হবেন সকলে হৃষ্টমন ॥
 বিছাধরী নাচে গায় গন্ধর্বে সঙ্গীত ।
 চারিদিকে জয়ধ্বনি শুনি সুললিত ॥
 লক্ষ লক্ষ পতাকা উড়িছে নানা রঙ্গে ।
 রাজগণ আইল কটক সব সঙ্গে ॥
 নানা রঙ্গে রথ রথী হস্তী ঘোড়া সাজে ।
 নানা জাতি বাঘ শুনি নানা দিকে বাজে ॥
 অধিবাস করিতে আসিল ঋষি মুনি ।
 রামজয় বলিয়া করিছে বেদধ্বনি ॥
 নারিকেল গুবাক রোপিল সারি সারি ।
 ঘূতের প্রদীপ জ্বালে প্রজার কুমারী ॥
 নানা রঙ্গে নির্মাইল লক্ষ লক্ষ ঘর ।
 বিবিধ পতাকা উড়ে চালের উপর ॥
 পৃথিবীতে আছে যত নানা উপহার ।
 তাহা আনি লক্ষ লক্ষ ভরিল ভাণ্ডার ॥
 নানা রঙ্গে শোভিত বসনে পরিহিত ।
 অযোধ্যার যত লোকে সবে আনন্দিত ॥
 আসিল দেশের লোকে অযোধ্যানগরে ।
 কেহ নাচে কেহ গায় হরিশ অস্তরে ॥
 অধিবাস দেখিতে আসিল দেবগণ ।
 অস্তুরীক্ষে রহে সবে চাপিয়া বাহন ॥
 ব্রহ্মা শিব আদি করি যত দেবগণ ।
 ভগবতী আদি করি দেবী অগণন ॥
 অধিবাস দেখিতে বসিল সর্বজন ।
 কোঁতুকেতে পুষ্পবৃষ্টি করেন তখন ॥

ঋষিগণে দেখিয়া উঠিয়া রঘুনাথ ।
 পাত্ত অর্ঘ্য দিয়া পূজে করি প্রণিপাত ॥
 বিশিষ্ঠ বলেন, রাম ! শাস্ত্রের বিহিত ।
 তব অধিবাস আমি করি যে উচিত ॥
 পিতৃবিহ্বামানে ধর দণ্ড আর ছাতি ।
 নহয় রাজার যেন তনয় যযাতি ॥
 বিশিষ্ঠ করেন স্তম্ভল বেদধ্বনি ।
 অখিল ভুবনে শব্দ রামজয় শুনি ॥
 অধিবাস রামের হইল সমাপন ।
 আনন্দে দেখিয়া স্বর্গে গেল দেবগণ ॥
 জয় জয় ছালাছলি করে রামাগণ ।
 নৃত্য-গীতে আনন্দিত অযোধ্যা-ভুবন ॥
 রাম সীতা উপবাসী রহে দুই জন ।
 চন্দনে চর্চিত অঙ্গ সকোঁতুক মন ॥
 নানা রত্ন ধন সবে দিলেক যোঁতুক ।
 নিজালায়ে গেল সব দেখিয়া কোঁতুক ॥
 বলেন বিশিষ্ঠ মুনি রাজার সদনে ;—
 অধিবাস রামের হইল শুভক্ষণে ॥
 শুনিয়া হাসেন রাজা আনন্দিত মনে ।
 নানা রত্ন-দানে রাজা তুষিল ব্রাহ্মণে ॥
 বেলার হইল শেষ নক্ষত্র গগনে ।
 অধিবাস দেখি ঘরে গেল সর্বজন ॥
 সুগন্ধি পুষ্পের গন্ধ বহে চতুর্ভিত ।
 দেবতুল্য বেশ সবে শুইয়া নিদ্রিত ॥
 রাত্রি অবসান হয় সূর্যের উদয় !
 শয়ন ত্যজিল সবে আনন্দ হৃদয় ॥

———
 শ্রীরামচন্দ্রের রাজ্যপ্রাপ্তি-সংবাদে সকলের আনন্দ ।
 রথ রথী ঘোড়া সাজে, নানারঙ্গে বাঘ বাজে,
 মুনি সব করে জয়ধ্বনি ।

জয় জয় হলাহলি, করে সবে কোলাকুলি,
 সর্বলোকে কি দুঃখী কি ধনী ॥
 শিশু নারী জয়ায়িত, পুষ্পগন্ধে সুশোভিত,
 আমোদ-প্রমোদ সব ঘরে ।
 স্বর্গপুরী তুল্য বেশ, অযোধ্যার সর্বদেশ,
 নাচে গায় হরিশ অস্তুরে ॥
 সবে ভাবে রঘুপতি, হইবেন মহীপতি,
 ঘুচিল সবার আজি ক্রেশ ।
 না হইবে দুঃখ শোক, আনন্দিত সর্বলোক,
 নিস্তার পাইল সর্বদেশ ॥
 ঘুচিল সকল ভয়, সবাই আনন্দময়,
 রাম নামে পাইবে নিষ্কৃতি ।
 রাম বিষ্ণু-অবতার, লবেন সবার ভার,
 বৈকুণ্ঠেতে করিবে বসতি ॥
 এতেক ভাবিয়া মনে, আনন্দিত সর্বজনে,
 আনন্দেতে পাসরে আপনা ।
 অযোধ্যার যত লোক, ভুলিল সকল শোক,
 আনন্দে পূরিত সর্বজনা ॥
 নানা বস্ত্র অলঙ্কার, পরিধান সবাকার,
 রূপে বেশে দেব-অবতার ।
 আনন্দে বিহ্বল প্রায়, রামগুণ সবে গায়,
 জয় জয় করে বারে বার ॥
 অযোধ্যানগরবাসী, বলে সবে দাসদাসী,
 মনে হয় অতি হরষিত ।
 ঘুচিবে সবার দুঃখ, ভুলিব বিবিধ সুখ,
 এত বলি সবে আনন্দিত ॥
 মধুর অযোধ্যাকাণ্ড, শুনিতে অমৃতভাণ্ড,
 যাতে হয় পাপের বিনাশ ।
 রামায়ণ আকর্ণনে, ইহা কুস্তিভাস ভণে,
 হয় অস্তকালে স্বর্গে বাস ॥

ভরতকে রাজা করিয়া রামকে ঘনে পাঠাইতে
 কুঞ্জার কৈকেয়ীকে মন্ত্রণাদান ।

পূর্ণ স্বর্ণকুম্ভ উপরে আশ্রমসার ।
 শাস্ত্রের বিহিত সব মঙ্গল আচার ॥
 নানা রঞ্জে নির্মাইল টুঙ্গী শতে শতে ।
 নানা বর্ণে পতাকা উড়িছে প্রতি পথে ॥
 নানা রঞ্জে নির্মিত আগার সারি সারি ।
 জিনিয়া অমরাবতী রম্যবেশধারী ॥
 ইন্দ্রপুরে যেমন সবার রম্যবেশ ।
 তেমন মঙ্গলযুক্ত অযোধ্যার দেশ ॥
 দৈবের নির্বন্ধ কভু না যায় খণ্ডন ।
 কে জানে ঘটবে আসি প্রমাদ কখন ॥
 পূর্বজন্মে ছিল নামে ছন্দুভি অঙ্গরা ।
 জন্মিল সে কুঞ্জা হয়ে নামেতে মধুরা ॥
 কৈকেয়ীর চেড়ী ভরতের ধাত্রী মাতা ।
 রামের দুঃখের হেতু সৃজিল বিধাতা ॥
 দশরথ বিবাহে সে চেড়ী পেয়েছিল ।
 রাম রাজা হন দেখি ব্যাকুলিত হ'ল ॥
 রামের দুঃখের হেতু তার উপাদান ।
 রাজার মরণ, কৈকেয়ার অপমান ॥
 মরিবে রাবণ যাতে বিধাতা সে জানে ।
 বিধাতা সৃজিল তারে এই সে কারণে ॥
 আচম্বিতে কুঞ্জী চেড়ী আইল বাহিরে ।
 প্রজ্ঞা আনন্দিত সব দেখিল নগরে ॥
 টুঙ্গীর উপরে উঠি কুঞ্জী তাহা দেখে ।
 রাম রাজা হবে মহা হরষিত লোকে ॥
 বহু চেড়ী এক ঠাই টুঙ্গীর উপরে ।
 কুঞ্জী চেড়ী জিজ্ঞাসিল অপর চেড়ীরে ॥
 কি কারণ হরষিত অযোধ্যানগর ?
 কি হেতু কোশল্যা রাণী হরষি অস্তুর ?

কি জন্তু রামের মাতা করে বহু দান ?
 সবে মেলি তোমরা কি কর অনুমান ?
 আর চেড়ী বলে, তুমি না জান মস্থরা !
 ঘোঁষরাজ্যে অভিশিক্ত হবে রাম স্বরা ॥
 এ কথা শুনিয়া কুঁজী সে চেড়ীর মুখে ।
 বজ্রাঘাত হ'ল যেন মস্থরার বৃকে ॥
 বিধাতার লেখা কেবা করিবে খণ্ডন ।
 কৈকেয়ীয়ে গালি দিতে করিল গমন ॥
 কৈকেয়ী আপন ঘরে ছিলেন শয়নে ।
 সস্থর মস্থরা গিয়াকহিল সেখানে ॥
 নির্বুদ্ধি কৈকেয়ি ! শুয়ে আছ কোন্ লাজে ।
 তো হেন পুত্রের সনে কেহ নাহি মজে ॥
 মানেন্তে মরিবি তুই শোকের সাগরে ।
 ভরতে এড়িয়া রাজা রামে রাজা করে ॥
 ভরতেরে রাজা কর, রাখ নিজ পণ ।
 রাজারে কহিয়া রামে পাঠাও কানন ।
 রাম রাজা হইলে কিসের অধিকার ?
 ভরত হইলে রাজা সকলি তোমার ॥
 একে ত রাজার হও তুমি মুখ্যা রাণী ।
 ভরত হইলে রাজা রাজার জননী ॥
 কৈকেয়ী বলেন, রাম ধার্মিক সৃজন ।
 কোন্ দোষে করিব অনিষ্ট-সংঘটন ?
 আমার গৌরব রাম রাখে অতিশয় ।
 করিতে রামের মন্দ উচিত ত নয় ॥
 গুণের সাগর রাম বিচারে পণ্ডিত ।
 পিতৃরাজ্য জ্যেষ্ঠ পুত্র পাইতে উচিত ॥
 রাম রাজা হইলে সন্তুষ্ট সর্বজন ।
 ভূষিবেন সবাকারে রাম বহু মানে ॥
 ভরতেরে রাজ্য রাম দিবেন আপনি ।
 রাধিবেন আমার গৌরব বড় রাণী ॥

রাম রাজা হইলে আমার বহু মান ।
 শুভবার্তা কহিলি কি দিব তোরে দান ?
 রাম রাজা হবেন হরিব সর্বজন ।
 হরিষে বিষাদ কুঁজী কর কি কারণ ॥
 অঙ্গ হ'তে অলঙ্কার খুলি শশব্যস্তে ।
 আদরে কৈকেয়ী দেন মস্থরার হস্তে ॥
 কৈকেয়ী বলেন, কুঁজী ! না কর উত্তর ।
 রাম রাজা হ'লে ধন দিব ত বিস্তর ॥
 কুপিলা মস্থরা চেড়ী ছুই গুষ্ঠ কাঁপে ।
 কৈকেয়ীয়ে গালি পাড়ে অতুল প্রতাপে ॥
 হাত হ'তে অলঙ্কার ছড়াইয়া ফেলে ।
 ছুই চক্ষু লাল করি কৈকেয়ীয়ে বলে ;—
 কৈকেয়ি ! তোমার হুঃখ আমার অন্তরে ।
 বলি হিত, বিপরীত বুঝাও আমারে ॥
 সপত্নী-তনয় রাজা, তুমি আনন্দিতা ।
 কোশল্যা তোমার চেয়ে বুদ্ধিতে পণ্ডিতা ॥
 নিজ পুত্রে রাজা করে স্বামীর সোহাগে ।
 থাকিবে দাসীর স্থায় কোশল্যার আগে ॥
 থাকিল কোশল্যা রাণী সীতার সম্পদে ।
 দাঁড়াইতে নারিবি সীতার পরিচ্ছদে ॥
 কোশল্যে জিনিলে তুমি সোহাগের দাপে ।
 নিজ পুত্রে রাজা করে সেই মনস্তাপে ॥
 ভরত থাকিল গিয়া মাতামহ ঘরে ।
 রাজার কি দোষ দিব না দেখি তাহারে ॥
 সতীনের আনন্দেতে সানন্দ সতিনী ।
 হেন অপরূপ কভু না হেরি না শুনি ॥
 লালিয়া পালিয়া বড় করিহু ভরতে ।
 মাতা-পুত্রে পড়িল সে কোশল্যার হাতে ॥
 শ্রীরাম লক্ষ্মণ ছুই একই শরীর ।
 উভয়ে করিবে রাজ্য ভরত বাহির ॥

তবে ত ভারত তোর হইল বঞ্চিত ।
 হিত কথা বলিলাম বুঝিলি অহিত ॥
 ভারত না পেলো রাজ্য না আসিবে দেশে ।
 না দেখিবে মুখ তব থাকিবে প্রবাসে ॥
 মঙ্গলা করিয়া রামে পাঠাও কানন ।
 ভবতেরে রাজ্য দেহ যদি লয় মন ॥
 শুনিয়া কুঁজীর কথা কৈকেয়ীর আশ ।
 কুঁজীর বচনে তার বুদ্ধি হ'ল নাশ ॥
 দেব দৈত্য আদি লোক রাম হেতু স্মৃখী ।
 প্রমাদ পাড়িল চেড়ী কোথাও না দেখি ॥
 কৈকেয়ী বলেন, কুঁজী ! তুমি হিতৈষিনী ।
 রাম মম মন্দকারী কিছই না জানি ॥
 ভারত প্রবাসে রাম রাজ্য হবে আজি ।
 কেমনে অচ্ছা করি যুক্তি বল কুঁজী ॥
 নৃপতির প্রাণ বাম গুণের সাগর ।
 কেমনে পাঠাব তারে বনের ভিতর ?
 ঘরেতে রাখিব তারে রাজ্য নাহি দিব ।
 কোন দোষে শ্রীরামেরে বনে পাঠাইব ?
 চারি পুত্র আছে তাঁর ভারত বিদেশে ।
 অংশ অনুসারে ভাগ পাইবেন শেষে ॥
 জ্যেষ্ঠ ভাই আছে তার কর বিবেচনা ।
 কর দেখি কুঁজী ! তুমি ভাল কি মঙ্গলা ॥
 সবে তুষ্ট শ্রীরামের মধুর বচনে ।
 হেন রামে কেমনে পাঠাবে রাজ্য বনে ॥
 ভারত পাইবে রাজ্য না দেখি উপায় ।
 যুক্তি বল ভারত কিরূপে রাজ্য পায় ॥
 কি প্রকারে রামের হইবে বনবাস ?
 ভারতেরে রাজ্য দিয়া পুরাইব আশ ?
 কুঁজী বলে যুক্তি চাহ যুক্তি দিতে পারি ।
 হেন যুক্তি দিব যে ভারতে রাজ্য করি ॥

পূর্বকথা সকল আমার আছে মনে ।
 সে সকল কথা কহি শুন সাবধানে ॥
 পূর্বে যুদ্ধ করিল যে দানব সম্বর ।
 সেই যুদ্ধে মহারাজ ক্ষতকলেবর ॥
 তাহাতে করিলে তুমি তাঁর সেবা পূজা ।
 সুস্থ হয়ে বর দিতে চাহিলেন রাজা ॥
 আরবার রাজার যে হইল বিস্ফোট ।
 তাপ দিতে মুখের ঠেকিল ছই ঠোঁঠ ॥
 রক্তপূয় যতেক লাগিল তব মুখে ।
 তব যত ছুঃখ রাজা দেখিল সম্মুখে ॥
 তোমার সেবায় রাজা পাইল নিস্তার ।
 বর দিতে চাহিল তোমায় পুনর্বার ॥
 তখন বলিলে তুমি রাজার গোচর ।
 কুঁজী যবে বর চাহে তবে দিও বর ॥
 ছই বারে ছই বর থাক্ তব ঠাই ।
 কুঁজা যবে বর চাহে তবে যেন পাই ॥
 এ কথা কহিলে তুমি আসি মোর স্থানে ।
 তুমি পাসরিলে মোর সব আছে মনে ॥
 আজি রাম রাজ্য হবে বেলা অবশেষে ।
 আগে আসিবেন রাজা তোমার সম্বাষে ॥
 পট্টবস্ত্র এড়ি পর মলিন বসন ।
 খসাইয়া ফেল যত গায়ের ভূষণ ॥
 ভূমিতে পড়িয়া থাক ত্যাজিয়া আহার ।
 রাজা জিজ্ঞাসিবে তব দেখিয়া আকার ॥
 জিজ্ঞাসা করিবে রাজা কোপের কারণ ।
 না দিও উত্তর তুমি করিও রোদন ॥
 বিবিধ প্রকারে তোমা করিবে সাস্বনা ।
 যাচিবে তোমায় বস্ত্র অলঙ্কার নানা ॥
 তবে পূর্ব-নির্বন্ধ কহিবে তাঁর স্থান ।
 আগে সত্য করাইয়া পিছে মাগ দান ॥

পূর্বকথা রাজার অবশ্য হবে মনে ।
 দুই বর মাগিবে রাজার বিঘ্নমানে ॥
 এক বরে করাইবে রাজা ভরতেরে ।
 আর বরে পাঠাইবে অরণ্যে রামেরে ॥
 চতুর্দশ বর্ষ যদি রাম থাকে বনে ।
 পৃথিবী পূরাবে তুমি ভরতের ধনে ॥
 তুমি যদি প্রাণ চাহ রাজা প্রাণ দেয় ।
 রাম হেন পিয় পুত্র বনে উপেক্ষয় ॥
 এমনি আসক্ত রাজা তোমার উপর ।
 সত্যবন্ধ আছে কেন নাহি দিবে বর ?
 ফিরিল কৈকেয়ী রাণী কুঁজীঃ বচনে ।
 অধর্ম অশশ কিছু নাহি করে মনে ॥
 ঘোর ব্রহ্মশাপ আছে কৈকেয়ীর তরে ।
 সেই দোষে কৈকেয়ী প্রমাদ এত করে ॥
 পিত্রালেয়ে কৈকেয়ী ছিলেন শিশুকালে ।
 করিয়াছিলেন ব্যঙ্গ ব্রাহ্মণেরে ছলে ॥
 তাহাতে জন্মিল মনে ব্রাহ্মণের তাপ ।
 কুপিয়া ব্রাহ্মণ তাঁরে দিল ব্রহ্মশাপ ॥
 দেখিয়া করিস্ ব্যঙ্গ কহিলি কর্কশ ।
 সর্বলোকে গায় যেন তব অপযশ ॥
 ব্রহ্মশাপ কৈকেয়ীর না হয় খণ্ডন ।
 সেই হেতু ঘটিলেক এ সব ঘটন ॥
 অনন্তর কৈকেয়ীর প্রসন্ন বদন ।
 করে ধরি কুঁজীরে করিল আলিঙ্গন ॥
 কুঁজীরে কৈকেয়ী কহে অতি হৃষ্টমনে ।
 তব তুল্য গুণবতী না দেখি ভুবনে ॥
 যেখানে যে আছে মোর সকলি কুৎসিত ।
 সকলি অহিত মম তুমি মাত্র হিত ॥
 গৌরবর্ণ ধর তুমি যেন চন্দ্রকলা ।
 গলায় তুলিয়া দেহ দিব্য পুষ্পমালা ॥

রত্নহার লও পর কুঁজের উপর ।
 ভরত হইলে রাজা দিব ত বিস্তর ॥
 যেমন বিস্তর সেবা করিলি আমার ।
 যদি দিন পাই তবে শুধিব সে ধার ॥
 যদি রাজা রামেরে পাঠায় আজি বন ।
 তবে সে করিব স্নান কবিব ভোজন ॥
 প্রতিজ্ঞা করিহু আমি তব বিঘ্নমানে ।
 কাননে পাঠাই রামে দেখ এইক্ষণে ॥
 কৈকেয়ীর কথা শুনি কুঁজীর উল্লাস ।
 রচিল অযোধ্যাকাণ্ড কবি কৃত্তিবাস ॥

ভরতকে রাজ্য দান ও শ্রীরামচন্দ্রকে বনবাস
 দিবার জন্য দশরথের নিকটে
 কৈকেয়ীর প্রার্থনা ।

কুঁজী বলে, কৈকেয়ী ! বিলম্ব নাহি সাজে ।
 রাম রাজা হইলে নহিবে কোন কাজে ॥
 যাবৎ না দেয় রাজা রামে সিংহাসন ।
 তাবৎ রাজার ঠাই কর নিবেদন ॥
 এক্ষণে আসিবে রাজা তোমা সস্তাষণে ।
 যেরূপ কহিবে তাহা চিন্তা কর মনে ॥
 শুনিয়া কুঁজীর বাক্য কৈকেয়ী সে কালে ।
 আশ্রয় ফেলি দিয়া লুটে ভূমিতলে ॥
 হেথা দশরথ রাজা হরষিত মনে ।
 চলিলেন কোতুকে কৈকেয়ী সস্তাষণে ॥
 ভাবিলেন সস্তাষিয়া আসিয়া গহ্বর ।
 শ্রীরামে করিব আমি ছত্রদণ্ডধর ॥
 নাহি গেলে কৈকেয়ী করিবে অহুষণে ।
 ধন জন বিফল আমার রাজ্য ভোগ ॥
 দশরথ নৃপতির নিকট মরণ ।
 সমাদরে কৈকেয়ীকে করে সস্তাষণ ॥

যে ঘরে কৈকেয়ীদেবী লোটে ভূমিপরে ।
 বিধির নির্বন্ধ রাজা গেল সেই ঘরে ॥
 পূর্বজ্ঞানে গেল রাজা না জানে প্রমাদ ।
 গড়াগড়ি যায় রাণী করিছে বিবাদ ॥
 সরল হৃদয় রাজা এই নাহি বুঝে ।
 অজগর সর্প যেন কৈকেয়ী গরজে ॥
 প্রাণের অধিক রাজা কৈকেয়ীরে দেখে ।
 প্রাণ উড়ে যায় দেখি কৈকেয়ীর ছুখে ॥
 ধীরে ধীরে জিজ্ঞাসেন কম্পিত অন্তরে ।
 বনে মৃগ কাঁপে যেন বাঘিনীর ডরে ॥
 কি হেতু করিলে ক্রোধ বল কার বোলে ?
 কোন্ ব্যাধি শরীরে লুটিছ ভূমিতলে ?
 ব্যাধি-পীড়া হয় যদি তোমার শরীরে ।
 বৈষ্ণব আনি স্নান করি বলহ আমারে ॥
 পৃথিবীমণ্ডলে আমি বসুমতী-পতি ।
 আমার সমান রাজা নাহি গুণবতী ॥
 গুনিয়া আমার নাম দেব ডরে কাঁপে ।
 ত্রিভুবন দ্বারে খাটে আমার প্রতাপে ॥
 সকল পৃথিবীমধ্যে মম অধিকার ।
 ধন জন যত আছে সকলি তোমার ॥
 কোন্ কার্যে কৈকেয়ী ! করহ অভিমান ?
 আঞ্জা কর তাহাই তোমারে করি দান ॥
 এত যদি কৈকেয়ী রাজার পায় আশ ।
 পূর্বকথা তাঁর কাছে করিল প্রকাশ ॥
 রোগ-পীড়া নহে মোর পাই অপমান ।
 আগে সত্য কর তবে পিছে মাগি দান ॥
 কৈকেয়ী প্রমাদ পাড়ে রাজা নাহি জানে ।
 সত্য করে দশরথ কৈকেয়ী-বচনে ॥
 মহাপাপ লাগি যেন বনে মৃগ ঠেকে ।
 প্রমাদে পড়িবে রাজা পাছু নাহি দেখে ॥

ভূপতি বলেন, প্রিয়ে ! নিজ কথা বল ।
 সত্য করি যতপি তোমারে করি ছল ॥
 যেই দ্রব্য চাহ তুমি তাহা দিব দান ।
 আছুক অশ্বের কাজ দিব নিজ প্রাণ ॥
 কৈকেয়ী বলেন সত্য কবিলে আপনি ।
 অষ্টলোকপাল সাক্ষী শুন সত্যবাণী ॥
 নক্ষত্র ভাস্কর চন্দ্র যোগ তিথি বার ।
 রাত্রি দিবা সাক্ষী হও সকল সংসার ॥
 একাদশ কজ সাক্ষী দ্বাদশ আদিত্য ।
 স্থাবর জঙ্গম সাক্ষী যারা আছে নিত্য ॥
 স্বর্গ মর্ত্য পাতাল গুহ্য বাপ ভাই ।
 সবে সাক্ষী রাজার নিকটে বর চাই ॥
 স্মরণ করহ রাজা ! যে আমার ধার ।
 পূর্বে ছিল তাহা শোধি সত্যে হও পার ॥
 যুদ্ধে তব হয়েছিল ক্ষত কলেবর ।
 সেবিলাম তাহে দিতে চেয়েছিলে বর ॥
 কহিলাম পুনর্বীর বিক্ষেপে তারণ !
 তুষ্ট হয়ে বর দিতে চাহিলে রাজন্ ॥
 তবে আমি বলিলাম তোমার গোচর ।
 কুঁজী যবে বর চাহে তবে দিও বর ॥
 ছুইবারে ছুই বর আছে তব ঠাই ।
 সেই ছুই বর রাজা ! এইক্ষণে চাই ॥
 এক বরে ভরতেরে দেহ সিংহাসন ।
 আর বরে শ্রীরামেরে পাঠাও কানন ॥
 চতুর্দশ বৎসর থাকুক রাম বনে ।
 তত কাল ভারত বসুক সিংহাসনে ॥
 নির্ভর বচনে রাজা হইল কম্পিত ।
 অচেতন হইলেন নাহিক সংবিৎ ॥
 কৈকেয়ী-বচন যেন শেল বৃকে ফুটে ।
 চেতন পাইয়া রাজা ধীরে ধীরে উঠে ॥

মুখে ধূলী উঠে, রাজা কাঁপিছে অন্তরে ।
 হতজ্ঞান দশরথ বলে ধীরে ধীরে ;—
 পাপীয়সি ! আমারে বধিতে তব আশা ।
 স্ত্রীপুত্র যত লোক কহিবে কুভাষা ॥
 রাম বিনা আমার নাহিক অস্ত্র গতি ।
 আমারে বধিতে তোরে কে দিল দুর্মতি ?
 রাজ্য ছাড়ি যখন শ্রীরাম যাবে বন ।
 সেই দিনে সেই ক্ষণে আমার মরণ ॥
 স্বামী যদি থাকে তবে নারীর সম্পদ ।
 তিন কুল মজাইলি স্বামী করি বধ ॥
 স্বামী বধ করিয়া পুত্রেরে দিবি রাজ্য ।
 চণ্ডালহৃদয়ে ! তুই কবিলি কি কার্য্য ?
 এই কথা ভবত যতপি আসি শুনে ।
 আপনি মরিবে কি মারিবে সেইক্ষণে ॥
 মাতৃবধ-ভয়ে যদি না লয় পরাণ ।
 করিবে তথাপি তোর বহু অপমান ॥
 বিষদন্তে দংশিলি, ও কালভুজঙ্গিনি ।
 তোরে ঘরে আনিয়া মজিলাম আপনি ॥
 কোন্ রাজা আছে হেন কামিনীর বশ ?
 কামিনীর কথাতে কে ত্যজিবে ঔরস ?
 দশ হাজার বর্ষ লোক জীয়ে ত্রেতাযুগে ।
 ন' হাজার বর্ষ রাজ্য করি নানা ভোগে ॥
 অবশিষ্ট হাজার বৎসর আয়ু আছে ।
 পরমায়ু থাকিতে মজিহু তোর কাছে ॥
 পরমায়ু থাকিতে মজিল মম প্রাণ ।
 হাতে ধরি কৈকেয়ি । কর প্রাণদান ॥
 কৈকেয়ীর পায়ে রাজা লোটে ভূমিতলে ।
 সর্ব্বাঙ্গ তিতিল তাঁর নয়নের জলে ॥
 প্রভাতে বসিব কল্যা সভা বিদ্যমানে ।
 পৃথিবীর যত রাজা আসিবে সে স্থানে ॥

অধিবাস রামের হইল সবে জানে ।
 কি বলিয়া ভাণ্ডাইব সে সকল জনে ?
 ক্ষমা কর কৈকেয়ি ! করহ প্রাণ রক্ষা ।
 নিজ সোহাগের তুমি বুঝিলে পরীক্ষা ॥
 আমার এ বংশে কেহ স্ত্রীবাধ্য না হয় ।
 নিজ দোষে আমি মজি তোর দোষ নয় ॥
 স্ত্রীবশ যে জন তার হয় সর্ব্বনাশ ।
 গাছিল অযোধ্যাকাণ্ড কবি কুন্তিবাস ॥

—

বিমাতার নিকট পিতৃসত্যপালনার্থ শ্রীরামচন্দ্রের বনে
 গমনোদ্যোগ ।

কৈকেয়ী বলেন সত্য আপনি করিলে ।
 সত্য করি বর দিতে কাতর হইলে ॥
 সত্য ধর্ম্ম তপ রাজা করে বহু শ্রমে ।
 সত্য নষ্ট করিলে কি করিবেক রামে ?
 সত্য লজ্জ্ব যে তাহার হয় সর্ব্বনাশ ।
 সত্য যে পালন করে স্বর্গে তার বাস ॥
 যত রাজা হইলেন চন্দ্র-সূর্য্যবংশে ।
 সে সবার যশ গুণ সকলে প্রশংসে ॥
 যযাতি নামেতে রাজা পালিল পৃথিবী ।
 দেবযানী নামে তার মুখ্য মহাদেবী ॥
 শর্ম্মিষ্ঠার পুত্র হ'ল সবার কনিষ্ঠ ।
 পত্নীর বচনে রাজা তারে দিল রাষ্ট্র ॥
 শিবির নামে রাজা ছিল পৃথিবীর পাতা ।
 অসমসাহসী বার নহে কম দাতা ॥
 এক দ্বিজ ছিল তাঁর অন্ধ দুই ঔষধি ।
 অত্যন্ত দরিদ্র কিছু উপায় না দেখি ॥
 সে অন্ধ শিবিরাজে সত্য করাইল ।
 নিজ দুই চক্ষু শিবিরে তাঁর দান দিল ॥

আপনি হইল অন্ধ চক্ষু নাহি দেখে ।
 সত্য পালি সেই রাজা গেল স্বর্গলোকে ॥
 ইক্ষ্বাকু নামেতে রাজা ছিণ সূর্য্যবংশে ।
 ইক্ষ্বাকুর বংশ বলি সকলে প্রশংসে ॥
 পিতৃসত্য করিলেন ইক্ষ্বাকু পালন ।
 কনিষ্ঠ ভায়ের তরে দিল রাজ্যধন ॥
 পৃথ্বী ডুবাইতে পারে সাগরের নীরে ।
 সাগর না পারে পূর্ব-সত্য পালিবারে ॥
 দিবে সত্য করিলে আমারে দিলে বর ।
 এখন কাতর কেন হও নৃপবর ?
 নারীর মাথায় সন্ধি পুঙ্কণে কি পায় ।
 দশরথ পরিলেন কৈকেয়ী-মায়ায় ॥
 ভূমে গড়াগড়ি রাজা যায় অভিমানে ।
 এতেক প্রমাদ-কথা কেহ নাহি জানে ॥
 অধিবাস হইয়াছে জানে সর্বজন ।
 সবে বলে বশিষ্ঠ ! হইল শুভক্ষণ ॥
 কালি শ্রীরামের হইয়াছে অধিবাস ।
 আর কেন বিলম্ব না জানি সে আভাস ॥
 রাজার প্রতাপে হয় ত্রিভুবন বশ ।
 ভিতরে যাইতে কেহ না করে সাহস ॥
 পাত্র মিত্র বলে, শুন সুমন্ত্র সারথি !
 তোমা বিনা অন্তঃপুরে কারো নাহি গতি ॥
 শীঘ্র যাও সুমন্ত্র সারথি ! অন্তঃপুরে ।
 সকল দেশের রাজা আসিয়াছে দ্বারে ॥
 রাম-অভিষেকে আসিয়াছে দেবগণ ।
 এতক্ষণ বিলম্ব রাজার কি কারণ ?
 সুমন্ত্র সারথি গেল সকলের বোলে ।
 দেখে রাজা অজ্ঞান লুটিছে ভূমিতলে ॥
 সুমন্ত্র বলিছে, কেন ভূমিতে রাজন্ ।
 রামে রাজা করিতে হইল শুভক্ষণ ॥

শত শত রাজগণ আসিয়াছে দ্বারে ।
 বিলম্ব না কর প্রভু ! চলহ বাহিরে ॥
 রাজা বলিলেন, পাত্র ! না জান কারণ ।
 মোরে বধ করিতে কৈকেয়ীর যতন ॥
 বৃকে শেল মারিয়াছে বলিয়া কুবর্ণী ।
 তার সত্যে বন্দী আমি হয়েছি আপনি ॥
 শীঘ্র রামে আন গিয়া আমার বচনে ।
 তুমি আমি রাম যুক্তি করি তিনজনে ॥
 কৈকেয়ী বলেন, যাহ সুমন্ত্র ! ত্বরিত ।
 শীঘ্র রামে আন, নহে বিলম্ব উচিত ॥
 শুনিয়া চলিল রথ লইয়া সারথি ।
 উপস্থিত হইল যেখানে রঘুপতি ॥
 বাহিরে রাখিয়া রথ গেল অন্তঃপুরে ।
 ষোড়হাতে কহে গিয়া রামের গোচরে ;—
 কৈকেয়ীর সঙ্গে রাজা যুক্তি করে ঘরে ।
 আমারে পাঠাইলেন লইতে তোমারে ॥
 মুখ্যপাত্র সুমন্ত্র শ্রীরাম তাহা জানি ।
 গৌরবে দিলেন তারে আসন আপনি ॥
 শ্রীরাম বলেন, পিতৃ-আজ্ঞা শিরে ধরি ।
 বিলম্ব না করি আর চল যাত্রা করি ॥
 যাত্রাকাত্রে শ্রীরাম বলেন, শুন সীতা !
 আমি রাজ্য পাইব বিমাতা চিন্তাঘিতা ॥
 কোন্ যুক্তি কুঁজী দিল বিমাতার তরে ।
 না জানি বিমাতা আজ কোন্ যুক্তি করে ।
 রাজা সহ কৈকেয়ী কি করে অনুমান ।
 জেনে আসি পিতা কি করেন সংবিধান ।
 বাটীর বাহির হইলেন রঘুনাথ ।
 চারিভিতে ধায় লোক করি ষোড়হাত ॥
 শ্রীরাম লক্ষণ দৌছে চড়িলেন রথে ।
 দেখিতে সকল লোক ধায় চারিভিতে ॥

উর্দ্ধ্বাসে ধাইলেক নারী গর্ভবতী ।
 লজ্জা ভয় নাহি মানে কুলের যুবতী ॥
 কি করিবে স্বামী কি করিবে ধনে জনে ।
 যুচিবে সকল পাপ রাম-দরশনে ॥
 সারি সারি লোক সরে দাণ্ডাইয়া চায় ।
 শ্রীরামের যত গুণ সর্বলোকে গায় ॥
 বহু ভাগ্যে পাইলাম তোমা হেন রাজা ।
 জন্মে জন্মে রাম ! যেন করি তা পূজা ॥
 সর্বক্ষণ দেখি যেন তোমার বদন ।
 সর্বলোক মুক্ত হবে দেখিয়া চরণ ॥
 রামরূপে নারীগণ মজাইল চিত ।
 নয়নে না চান রাম পরনারী-ভিত ॥
 রূপ দেখি নারী সব মনে পুড়ে মরে ।
 কপাল নিন্দিয়া সবে গেল নিজ ঘরে ॥
 ঘরে গিয়া স্ত্রী সবার মন নহে স্থির ।
 পিতৃ কাছে প্রবেশ করেন রঘুবীর ॥
 এক প্রকোষ্ঠের দ্বারে রহেন লক্ষণ ।
 ঘরের ভিতর রাম করেন গমন ॥
 দশরথ রাজা ভূমে লোটে অভিমানে ।
 কৈকেয়ী রাজার কাছে আছে সেইখানে ॥
 শ্রীরাম বলেন, মাতা ! কহ ত কারণ ।
 কেন পিতা বিষাদিত ভূমিতে শয়ন ?
 কোপ যদি করেন, হাসেন আমা দেখে ।
 আজি কেন জিজ্ঞাসিলে কথা নাহি মুখে ॥
 কোন্ দোষ করলাম পিতার চরণে ।
 উত্তর না দেন পিতা কিসের কারণে ?
 ভরত শক্রবু ছই ভাই নাহি দেশে ।
 মাতুলের আলয়েতে রাহল প্রবাসে ॥
 বহু দিন গত, না আইল ছই জন ।
 সেই মনোহুখে বুঝি বিরস বদন ?

কোন্ জন কিংবা করিয়াছে অপরাধ ।
 ভূমে লোটাইয়া তেঁই করেন বিষাদ ?
 তুমি বুঝি পিতারে কহিলে কটুবাকী ।
 সত্য করি কহ গো বিমাতা-ঠাকুরাণি ।
 কি করিবে রাজ্যভোগে পিতার অভাবে ।
 আমারে কহ গো সত্য প্রাণ পাই তবে ॥
 কি আজ্ঞা পিতার আমি করিব পালন ।
 সেই কথা মাতা ! মোরে কহ বিবরণ ॥
 আছুক পিতার কার্য্য তোমার বচনে ।
 রাজ্য ছাড়ি প্রাণ ছাড়ি কি ছার জীবনে ॥
 শ্রীরাম সরল সে কৈকেয়ী পাপহিয়া ।
 কহিতে লাগিল কথা নিষ্ঠুর হইয়া ॥
 দৈত্যযুদ্ধে মহারাজ ঘায়েতে জর্জর ।
 তাহে সেবিলাম দিতে চাহিলেন বর ॥
 বিস্ফোট হইল পুনঃ করি সেবা-পূজা ।
 তাহে অণু বর দিতে চাহিলেন রাজা ॥
 এক বরে ভরতে করিব দণ্ডধর ।
 আর বরে রাম ! তুমি হও বনচর ॥
 ছইবারে ছই বর আছে মম ধার ।
 মম ধার শুধি তাঁরে সত্য কর পার ॥
 শিরে জটা ধরি তুমি পরিবে বাকল ।
 বনে চৌদ্দ বৎসর খাইবে ফুল-ফল ॥
 শুনিয়া কহেন রাম সহাস্ত-বদনে ।
 তোমার আজ্ঞায় মাতা ! যাব আমি বনে ॥
 করিয়াছ কোন্ কাজে পিতারে মূর্চ্ছিত ।
 লজ্জিতে তোমার আজ্ঞা নহে ত উচিত ॥
 আছুক পিতার কাজ তুমি আজ্ঞা কর ।
 তবে আজ্ঞা সকল হইতে মহন্তর ॥
 তবে শ্রীতি হবে রবে পিতার বচন ।
 চতুর্দশ বৎসর থাকিব গিয়া বন ॥

ভরতেইে ত্রিত্তে আনাও মাতা দেশ ।
 ভরত হইলে রাজা আনন্দ অশেষ ॥
 কোন দোষ নাহি মাতা তাহার শরীরে ।
 ধন জন রাজ্যভোগ দেহ ভরতেইে ॥
 কৈকেয়ী বলেন, রাম ! আগে যাহ বন ।
 ভরত আসিবে তবে এই নিকেতন ॥
 আমার কথাতে কোপ না করিও মনে ।
 শিরে জটা ধরি তুমি আজি যাও বনে ॥
 হেঁটমাথা করিয়া শুনে মহারাজ ।
 কি করিব কৈকেয়ীর নাহি ভয় লাজ ॥
 কৈকেয়ীর প্রতি রাম করেন আশ্বাস ।
 বিলম্ব নাহিক আমি যাব বনবাস ॥
 যাবৎ মায়েরে সীতা করি সমর্পণ ।
 তাবৎ বিলম্ব মাতা ! সহিবে এখন ॥
 ভূমে লোটাঁইয়া রাজা আছেন বিষাদে ।
 শুনে দৌহার বাক্য স্বপ্ন হেন বোধে ॥
 রামচন্দ্র পিতার চরণদ্বয় বন্দে ।
 দশরথ ক্রন্দন করেন নিরানন্দে ॥
 পিতারে প্রণমি রাম চলেন ত্রিত্ত ।
 হা রাম বলিয়া রাজা হলেন মূর্ছিত ॥
 মুখে নাহি শব্দ হয় নাহিক চেতন ।
 হইলেন বাহির যে শ্রীরাম-লক্ষণ ॥
 রামের এ সব কথা কেহ নাহি শুনে ।
 প্রাণের দোসর মাত্র লক্ষণ সে জানে ॥
 করেন কোশল্যা দেবী দেবতা-পূজন ।
 ধূপ ধূনা ঘৃতদ্বীপ জ্বালিল তখন ॥
 নানা উপহারে রাণী পূরিয়াছে ঘর ।
 সাত শত সপত্নী সে ঘরের ভিতর ॥
 সবে মাত্র কৈকেয়ী নাহিক এক জন ।
 সাত শত রাণী আর বহু নারীগণ ॥

কোশল্যার কাছে থাকে সাত শত রাণী ।
 রাজ্যময় এই মাত্র শব্দ সদা শুনি ॥
 হেনকালে শ্রীরাম মায়ের পদ বন্দে ।
 আশীর্বাদ করে রাণী মনের আনন্দে ॥
 তোমারে দিলেন রাজা নিজ রাজ্য দান ।
 সুপ্রসন্ন রাজলক্ষ্মী করুন কল্যাণ ॥
 নানাবিধ সুখ ভুঞ্জ হও চিরজীবী ।
 চিরকাল রাজ্য কর পালহ পৃথিবী ॥
 সেবিলাম শিব-শিবা-চরণকমলে ।
 তুমি পুত্র ! রাজা হও সেই পুণ্যফলে ॥
 শ্রীরাম বলেন, মাতা হর্ষ হও কিসে ?
 হাতেতে আসিল নিধি গেল দৈবদোষে ॥
 তুমি আমি সীতা আর অনুজ লক্ষণ ।
 শোকসিন্ধু-নীরে আজি মজি চারি জন ॥
 তোমারে কহিতে কথা আমি ভীত হই ।
 প্রমাদ পাড়িল মাতা বিমাতা কৈকেয়ী ॥
 বিমাতার বচনে বাইতে হ'ল বন ।
 ভরতেইে রাজ্য দিতে বিমাতার মন ॥
 শুনিয়া পড়িল রাণী মূর্ছিত হইয়া ।
 মা ! মা ! বলে ডাকে রাম ব্যাকুল হইয়া ॥
 মা ! মা ! বলিয়া রাম উচ্চৈঃস্বরে ডাকে ।
 মাতৃবধ করি বৃষ্টি ডুবিলু নরকে ॥
 কোশল্যারে ধরি তোলে শ্রীরাম-লক্ষণ !
 বহুক্ৰমে কোশল্যার হইল চেতন ॥
 চৈতন্য পাইয়া রাণী বলে ধীরে ধীরে ।
 সকল বৃত্তান্ত সত্য বলহ আমারে ।
 মোর দিব্য লাগে যদি ভাঁড়াও আমায় ।
 কি দোষে কৈকেয়ী বনে তোমারে পাঠায় ?
 শ্রীরাম বলেন, মাতা ! দৈবের ঘটন ।
 বিমাতার দোষ নাই, বিধির লিখন ॥

পিতৃসেবা বিমাতা করিল বারে বার ।
 ছুই বর দিতে ছিল পিতার স্বীকার ॥
 আজি আমি রাজা হব সকলের আগে ।
 শুনিয়া বিমাতা সেই ছুই বর মাগে ॥
 এক বরে ভরতে করিতে দণ্ডধর ।
 আর বরে আমি যাই বনের ভিতর ॥
 স্বামী বিনা স্ত্রীলোকের আর নাই গতি ।
 বিমাতার সেবায় পিতার শ্রীতি অতি ॥
 তুমি যদি সেবা মাতা ! করিতে পিতারে ।
 তবে কেন এত পাপ ঘটবে তোমারে ?
 এত যদি কহিলেন, শ্রীরাম মায়েরে ।
 ফুটিল দারুণ শেল কোশল্যা-অস্তরে ॥
 কাটিলে কদলী যেন লোটায় ভূতলে ।
 হা পুত্র ! বলিয়া রাণী রাম প্রতি বলে ;—
 গুণের সাগর পুত্র যার যায় বন ।
 সে নারী কেমনে আর রাখিবে জীবন ?
 রাজার প্রথমা জায়া আমি মহারাণী ।
 চণ্ডালী হইল মোর কৈকেয়ী সতিনী ॥
 ঘটাইল প্রমাদ কৈকেয়ী পাপীয়সী ।
 রাজারে কহিয়া রামে করে বনবাসী ॥
 সূর্য্যবংশ-রাজ্যে নাই অকাল-মরণ ।
 এই সে কারণে মম না যায় জীবন ॥
 পূজিলাম কত শত দেবদেবীগণে ।
 তার কি এ ফল বাছা তুমি যাবে বনে ?
 যত যত সূর্য্যবংশে রাজা জন্মেছিল ।
 বল দেখি স্ত্রীর বাক্যে কে হেন করিল ?
 অশশ রাখিল রাজা নারীর বচনে ।
 স্ত্রীবাধ্য পিতার বাক্যে কেন যাবে বনে ?
 স্ত্রীর বাক্যে যিনি পুত্রে পাঠান কাননে ।
 এমন পিতার কথা না শুনিও কানে ॥

লক্ষ্মণ বলেন সত্য তব কথা পুঞ্জি ।
 স্ত্রীবশ পিতার বাক্যে কেন রাজ্য ত্যজি ॥
 জ্যেষ্ঠ পুত্র রাজ্য পায় ইহা সবে ঘোষে ।
 হেন পুত্র বনে রাজা পাঠান কি দোষে ?
 আগে রাজ্য দিয়া পরে পাঠান কাননে ।
 হেন অপঘণ পিতা রাখেন ভুবনে ॥
 যাবৎ এ সব কথা না হয় প্রচার ।
 তাবৎ শ্রীরামচন্দ্র ! লহ রাজ্যভার ॥
 বার্ক্যে দুর্ব্বুদ্ধি রাজা নিতান্ত পাগল ।
 করিয়াছে বাধ্য তাঁরে কৈকেয়ী কেবল ॥
 যদি রঘুনাথ ! আমি তব আজ্ঞা পাই ।
 ভরতে খণ্ডিয়া রাজ্য তোমাকে দেওয়াই ॥
 আমি এই আছি রাম ! তোমার সেবক ।
 আজ্ঞা কর ভরতের কাটিব কটক ॥
 তুমি যদি হস্তে প্রভু ! ধর ধনুর্বাণ ।
 তব রণে কোন্ জন হবে আশুয়ান ?
 কোশল্যা বলেন শুন কি বলে লক্ষ্মণ ।
 বিমাতার বাক্যে তুমি কেন যাবে বন ?
 এক সত্য পালহ পিতার অঙ্গীকার ।
 ভরতের তরে দেহ সব রাজ্যভার ॥
 অশ্রু সত্য পালিতে নহিক প্রয়োজন ।
 দেশে থাক রাম ! তুমি না যাইও বন ॥
 মায়ের বচন লজ্জি পিতৃবাক্য ধর ।
 পিতা হ'তে মাতা তব অতি মহন্তর ॥
 গর্ভে ধরি দুঃখ পায় স্তন দিয়া পোষে ।
 হেন মাতৃ-আজ্ঞা রাম ! লজ্জ তুমি কিসে ?
 বাপের বচন রাখ লজ্জ মাতৃবাণী ।
 কোন্ শাস্ত্রে হেন কথা কোথাও না শুনি ॥
 শ্রীরাম বলেন মাতা ! শুন এক কথা ।
 পিতা অতিশয় মান্ত তোমার দেবতা ॥

দেখহ পরশুরাম পিতার কথায় ।
 অস্বাঘাত করিলেন মাতার মাথায় ॥
 পিতার আঙ্কায় অষ্টাবক্রের গোবধ ।
 সগর জন্মায় পুত্রগণের আপদ ॥
 সত্য না লঙ্ঘন পিতৃসত্যেতে তৎপর ।
 মম ছুঃখে পিতা কত হবেন কাতর ॥
 পিতৃসত্য আমি যদি না করি পালন ।
 বৃথা রাজ্যভোগ মম বৃথাই জীবন ॥
 বর্জিবেন বিমাতারে পিতা লয় মনে ।
 করিও তাঁহার সেবা তুমি রাত্রিদিনে ॥
 কোশল্যা বলেন রাম ! তুমি যাও বন ।
 তুমি বনে গেলে আমি ত্যজিব জীবন ॥
 মাতৃবধ করিলে হইবে তব পাপ ।
 মাতৃবধপাপে রাম ! বড় পাবে তাপ ॥
 পিতৃসত্য পালিবে সে মায়ের মরণে ।
 কোন্ পাপ বড় রাম ! ভাব দেখি মনে ?
 আফালন লক্ষ্মণ করেন অতিশয় ।
 শ্রীরাম বলেন তব বুদ্ধি ভাল নয় ॥
 যত যত্ন কর তুমি রাজ্য লইবারে ।
 তত যত্ন করি আমি যাইতে কান্তারে ॥
 বিমাতার দোষ নাহি দোষী নহে কুঁজী ।
 সকলি বুঝিবে ভাই ! বিধাতার বাজী ॥
 বিমাতা জানেন ভাল আমার চরিত ।
 জানিয়া শুনিয়া কহিলেন বিপরীত ॥
 ভরত হইতে তাঁর আমা প্রতি আশা ।
 বিমাতার দোষ নাহি আমার দুর্দশা ॥
 যে দিন যা হবে তাহা বিধি সব জানে ।
 ছুঃখ না ভাবিও ভাই ! ক্ষমা দেহ মনে ॥
 ছুঃখ না ভুঞ্জিলে কর্ম না হয় খণ্ডন ।
 সুখ ছুঃখ দেখ ভাই ! ললাট-লিখন ॥

প্রবোধ না মানে কালসর্প যেন গর্জে ।
 সুমিত্রাকুমার শিশু ঘন ঘন তর্জে ॥
 ধনুকেতে গুণ দিয়া ফিরে চারি ভিতে !
 কুপিয়া লক্ষ্মণ বীর লাগিল কহিতে ;—
 রাজ্যখণ্ড ছাড়িয়া হইব বনবাসী ।
 রাজ্যভোগ ত্যজি ফল-মূল অভিলাষী ॥
 সন্ন্যাস তপস্যা যত ব্রাহ্মণের কর্ম ।
 ক্ষত্রিয়ের সদা যুদ্ধ সেই তার ধর্ম ॥
 ক্ষত্রিয় কোথায় কে করেছে বনবাস ।
 শত্রুর বচনে কেন ছাড়ি রাজ্য-আশ ?
 সবে জানে বিমাতা শত্রুর মধ্যে গণি ॥
 তার বাক্যে রাজা ছাড়ে কোথাও না গুনি ॥
 তোমা বিনা পিতার মনেতে নাহি আন ।
 তুমি বনে গেলে রাজা ত্যজিবেন প্রাণ ॥
 তোমা বিনা রাজা যাইবেন পরশোকে ।
 প্রাণ ত্যজিবেন মাতা হেন পুত্রশোকে ॥
 এই শোকে মাতাপিতা ত্যজিবে জীবন ।
 মাতৃপিতৃহত্যা তুমি কর কি কারণ ?
 অকারণে হের এ আজানু বাহুদণ্ড ।
 অকারণে ধরি আমি ধনুক প্রচণ্ড ॥
 অকারণে ধরি খড়্গ চর্ম ভল্ল শূল ।
 আঙা কর ভারতেরে করিব নির্মূল ॥
 সকল হইল ব্যর্থ এ সব সম্পদ ।
 আমি দাস থাকিতে প্রভুর এ আপদ ।।
 শ্রীরাম বলেন, তার নাহি অপরাধ ।
 ভারত না জানে কিছু এ সব প্রমাদ ॥
 অকারণ ভারতেরে কেন কর রোষ ?
 বিধির নিবন্ধ ইহা তাহার কি দোষ ?
 রামেরে প্রবোধ দেন কোশল্যা লক্ষ্মণ ।
 দয়াময় রাম নাহি শুনেন বচন ॥

মায়েরে কহেন রাম প্রবোধ বচন ।
 আজ্ঞা কর মাতা তুমি ! যাই আমি বন ॥
 কোশল্যা কহেন রামে সজল-নয়নে ।
 না জানি হইবে কবে দেখা তব সনে ॥
 যে মন্ত্র কোশল্যা পেয়েছিল আরাধনে ।
 সেই মন্ত্র দিল পুত্র শ্রীরামের কানে ॥
 চতুর্দশ বর্ষ বনে কুশলে থাকিবে ।
 রক্ষা করো রামচন্দ্রে লোকপাল সবে ॥
 ব্রহ্মা বিষ্ণু রাখুন কার্ত্তিক গণপতি ।
 লক্ষ্মী সরস্বতী রক্ষা করুন পার্বতী ॥
 একাদশ রুদ্র আর দ্বাদশ যে রবি ।
 জলে স্থলে রক্ষা কর জননী পৃথিবী ॥
 চৌদ্দবর্ষ যদি রহে আমার জীবন ।
 তবে তোমা সনে রাম ! হবে দর্শন ॥
 বিদায় লইয়া যান মায়ের চরণে ।
 গেলেন লক্ষ্মণ সহ সীতা সন্তাষণে ॥
 শ্রীরাম বলেন, সীতা ! নিজ কর্মদোষে ।
 বিমাতার বাক্যে আমি যাই বনবাসে ॥
 বিবাহ করিয়া আছি এক বর্ষ ঘরে ।
 হেনকালে বিমাতা ফেলিল মহা ফেরে ॥
 ঠাঁহার বচনে আমি যাই বনবাস ।
 ভরতেরে রাজ্য দিতে বিমাতার আশ ॥
 চতুর্দশ বর্ষ আমি থাকি গিয়া বনে ।
 তাবৎ মায়ের সেবা কর রাত্রি-দিনে ॥
 জানকী বলেন, সুখে হইয়া নিরাশ ।
 স্বামী বিনা আমার কিসের গৃহবাস ?
 তুমি যে পরমগুরু তুমি যে দেবতা ।
 তুমি যাও যথা প্রভু ! আমি যাই তথা ॥
 স্বামী বিনা স্ত্রীলোকের আর নাহি গতি ।
 স্বামীর জীবনে জীয়ে মরণে সংহতি ॥

প্রাণনাথ ! কেন একা হবে বনবাসী ?
 পথের দোসর হব ক'রে লও দাসী ॥
 বনে প্রভু ! ভ্রমণ করিবে নানা ক্লেশে ।
 ছুঃখ পাসরিবে যদি দাসী থাকে পাশে ॥
 যদি বল, সীতা ! বনে পাবে নানা দুঃখ ।
 শত দুঃখ ঘুচে যদি দেখি তব মুখ ॥
 তোমার কারণে রোগ শোক নাহি জানি ।
 তোমার সেবায় ছুঃখ সুখ হেন মানি ॥
 শ্রীরাম বলেন, শুন জনকহৃদিত্তে !
 বিষম দণ্ডক বন না যাইও সীতে !
 সিংহ ভ্রাতা আছে তথা রাক্ষসী রাক্ষস ।
 বালিকা হইয়া কেন কর এ সাহস ?
 অন্তঃপুরে নানা ভোগে থাক মনসুখে ।
 ফল-মূল খেয়ে কেন ভ্রমিবে দণ্ডকে ?
 তোমার সুসজ্জা শয্যা পালঙ্ক কোমল ।
 কুশাকুরে বিদ্ধ হবে চরণ-কমল ॥
 তুমি আমি দৌঁহে হব বিকৃত-আকৃতি ।
 দৌঁহে দৌঁহাকারে দেখি না পাইব শ্রীতি ॥
 চতুর্দশ বর্ষ গেলে দেখ বুঝি মনে ।
 এই কাল গেলে সুখে থাকিব দুজনে ॥
 চিন্তা পরিহরি প্রিয়ে ! ক্ষান্ত হও মনে ।
 বিষম রাক্ষসগুলা আছে সেই বনে ॥
 শ্রীরামের বচনে সীতার গুণ্ট কাঁপে ।
 কহেন রামের প্রতি কুপিত সন্তাপে ॥
 পণ্ডিত হইয়া বল নির্বোধের প্রায় ।
 কেন হেন জনে পিতা দিলেন আমায় ?
 নিজ নারী রাখিতে যে করে ভয় মনে ।
 তারে বীর বলে নাকো কোন ধীর জনে ॥
 রাজ্য নিতে ভরত না করিল অপেক্ষা ।
 তার রাজ্যে স্ত্রী তোমার কিসে পায় রক্ষা ?

পেয়েছিলে রাজ্য তুমি লইল যে জন ।
 স্ত্রী লইতে বিলম্ব তাহার কতক্ষণ ?
 তব সঙ্গে বেড়াইতে কুশ কাঁটা ফুটে ।
 তৃণ হেন বাসি তুমি থাকিলে নিকটে ॥
 তব সঙ্গে থাকি যদি লাগে ধূলি গায় ।
 অগুরু চন্দন চুষা জ্ঞান করি তায় ॥
 তব সহ থাকি যদি পাই তরুমূল ।
 স্বর্গ কিংবা গৃহ নহে তার সমতুল ॥
 তব দুঃখে দুঃখ মম সুখে সুখভার ।
 আহারে আহার আর বিহারে বিহার ॥
 ক্ষুধা তৃষ্ণা যদি লাগে ভ্রমিয়া কানন ।
 শ্যামরূপ নিরখিয়া করি বারণ ॥
 বহুতীর্থ দেখিব অনেক তপোবন ।
 নানাবিধ পর্বতে করিব আরোহণ ॥
 যখন পিতার ঘবে ছিলাম শৈশবে ।
 বলিতেন আমারে দেখিয়া যুনি সবে ॥
 শুন হে জনকরাজ ! তোমার হুহিতা ।
 করিবেন বনবাস পতির সহিতা ॥
 ব্রাহ্মণের কথা কভু না হয় খণ্ডন ।
 বনবাস আছে মম ললাটে লিখন ॥
 তুমি ছাড়ি গেলে আমি ত্যজিব জীবন ।
 স্ত্রীবধ হইলে নহে পাপ বিমোচন ॥
 শ্রীরাম বলেন, বুঝিলাম তব মন ।
 তোমার পরীক্ষা করিলাম এতক্ষণ ॥
 বনে বাস করিবার হইয়াছে মন ।
 খুলে ফেল শরীরের যত আভরণ ॥
 এতেক শুনিয়া সীতা হরিষ অন্তরে ।
 খুলিলেন অলঙ্কার যা ছিল শরীরে ॥
 সম্মুখে দেখেন যত ব্রাহ্মণ সজ্জন ।
 সে সকলে দেন তিনি নিজ আভরণ ॥

আভরণ অর্পিয়া বলেন সীতা বাণী ;—
 ভূষণ পরেন যেন তোমার ব্রাহ্মণী ॥
 সীতার ভাণ্ডারে ছিল বহু বস্ত্র ধন ।
 সে সকল করিলেন তিনি বিতরণ ॥
 শ্রীরাম বলেন, শুন অমুজ লক্ষ্মণ ।
 দেশেতে থাকিয়া কর সবার পালন ॥
 দাস-দাসী সবাকারে করিও জিজ্ঞাসা ।
 রাজ্য লইবারে ভাই না করিও আশা ॥
 মাতাপিতা কাতর হইবেন মম শোকে ।
 কতক হবেন শান্ত তব মুখ দেখে ॥
 যেন তুমি সেই আমি শুনহ লক্ষ্মণ !
 একেরে দেখিলে হবে শোক পাসরণ ॥
 লক্ষ্মণ বলেন আমি হই অগ্রসর ।
 আমি সঙ্গে থাকিব হইয়া অমুচর ॥
 যেই তুমি সেই আমি বিধাতা তা জানে ।
 যদি আমি থাকি তুমি কি করিবে বনে ।
 সীতা সঙ্গে কেমনে ভ্রমিবে বনে বনে ?
 সেবকে ছাড়িলে দুঃখ পাবে দুই জনে ॥
 রাজার কুমারী সীতা দুঃখ নাহি জানে ।
 সেবক বিহনে দুঃখ পাবেন কাননে ॥
 শ্রীরাম বলেন, ভাই ! যদি যাবে বন ।
 বাছিয়া ধনুক-বাণ লহ রে লক্ষ্মণ ॥
 বিষম রাক্ষস সব আছে সেই বনে ।
 ধনুর্বাণ লহ যেন জয়ী হই রণে ॥
 পাইয়া রামের আঞ্জা লক্ষ্মণ সত্ত্বর ।
 ভাল ভাল বাণ সব বাঙ্কিল বিস্তর ॥
 শ্রীরাম বলেন, বলি, লক্ষ্মণ । তোমারে ।
 সন্ধান করহ ধন কি আছে ভাণ্ডারে ॥
 ধনে আর আমার নাহিক প্রয়োজন ।
 ব্রাহ্মণ-সজ্জনে দেহ যত আছে ধন ॥

মুনি ঋষি আদি করি কুল-পুরোহিত ।
 তা সব্বারে ধন দিয়া তোষহ ত্বরিত ॥
 বাছিয়া বাছিয়া আন কুলীন ব্রাহ্মণ ।
 যেবা যত চাহে তারে দেহ তত ধন ॥
 যতেক দরিদ্র আছে ভিক্ষা মাগি খায় ।
 তা সব্বারে দেহ ধন যেবা যত চায় ॥
 মম হুঃখে যত লোক হইবেক হুঃখী ।
 চতুর্দশ বৎসর যেন হয় তাবা সুখী ॥
 পাইলেন লক্ষ্মণ শ্রীরামের আদেশ ।
 তাঁহার সর্ম্মুখে ধন আনেন অশেষ ॥
 ভাণ্ডার করেন শূণ্য ধন-বিতরণে ।
 সব্বারে তোষেন রাম মধুর-বচনে ॥
 আমা লাগি তোমরা না করিও ক্রন্দন ।
 করিবে ভরত ভাই সবার পালন ॥
 কোন দোষ নাহি ভাই ভরত-শরীরে ।
 বড় তুষ্ট আছি আমি তার ব্যবহারে ॥
 নানা রত্ন দান করিলেন পারিহার ।
 দানে শূণ্য করিলেন শতেক ভাণ্ডার ॥
 সকল ভাণ্ডার শূণ্য আব নাহি ধন ।
 হেনকালে বার্তা পায় ত্রিজটা ব্রাহ্মণ ॥
 বড়ই দরিদ্র সে ত্রিজটা নাম ধবে ।
 দান-কথা শুনিয়া সে ধড়ফড় করে ॥
 চলিতে শকতি নাই চক্ষু ক্ষীণ হয় ।
 ব্রাহ্মণী তাঁহাকে হিত উপদেশ কয় ;—
 দীনেরে করেন ধনী দিয়া রাম ধন ।
 তুমি আমি বুড়া বুড়ী মরি ছই জন ॥
 তুমি বৃদ্ধ আমি নারী হুঃখ যে অপার ।
 কে আর পুন্নিবে কোথা মিলিবে আহার ?
 শুনিয়া ব্রাহ্মণ তবে নড়ী ভর ক'রে ।
 অতি কষ্টে গিয়া কহে রামের গোচরে ;—

আমি দ্বিজ দরিদ্র ত্রিজটা নাম ধরি ।
 বৃদ্ধকালে ব্রাহ্মণীকে পালিতে না পারি ॥
 পুত্র নাই আমার কে করিবে পালন ?
 অনাহারে বুড়া বুড়ী মরি ছই জন ॥
 নড়ী ভর করিয়া আসিলাম সম্প্রতি ।
 তোমা বিনা দারিদ্রের আব নাহি গতি ॥
 শ্রীরাম বলেন, দ্বিজ ! আসিয়াছ শেষে ।
 ধন নাই লক্ষ ধেনু লয়ে যাও দেশে ॥
 ধেনু-দান পেয়ে দ্বিজ হরিষ অন্তরে ।
 কাপড় আঁটিয়া যায় পালের ভিতরে ॥
 দৃঢ় করি চুল বান্ধি নড়ী করি হাতে ।
 পালেতে প্রবেশ কবে উঠিতে পড়িতে ॥
 বুড়ার বিক্রম দেখি ভাবে সর্ব্বজনে ।
 ধেনুতে মারিবে নাকি এ বৃদ্ধ ব্রাহ্মণে ॥
 হাসিয়া বিহ্বল কেহ কেহ বা বিষাদে ।
 ব্রহ্মবধ হেতু রাম পড়িল প্রমাদে ॥
 শ্রীবাম বলেন, দ্বিজ কহিতে ডরাই ।
 না পারিবে লইবারে এক লক্ষ গাই ॥
 এক ধেনু লইতে তোমার এ সঙ্কট ।
 মগ্নিবারে যাও কেন ধেনুর নিকট ?
 ধেনুর সহিত দান দিলাম গোশাল ।
 গোশালে রাখিবে ধেনু থাকে যত কাল ॥
 অনুমানে জানি তুমি বড়ই নিধন ।
 আঞ্জা কর দিতে পারি আর কিছু ধন ॥
 দ্বিজ বলে প্রভু ! আর নাহি চাহি ধন ।
 ধেনু-ধন বিনা নাহি অন্ন প্রয়োজন ॥
 এক লক্ষ ধেনু লয়ে দ্বিজ গেল দেশ ।
 রচিল অযোধ্যাকাণ্ড কাবি কৃষ্ণিবাস ॥

লক্ষণ ও সীতা সহ শ্রীরামের
বনগমন ।

রামের প্রসাদে বাড়ে সবার ঐশ্বর্য্য ।
দরিদ্র হইল ধনী শুনিতে আশ্চর্য্য ॥
রাজ্যখণ্ড ছাড়ি রাম যান বনবাস ।
শিরে হাত দিয়ে কাঁদে সবে নিজ বাস ॥
মাঝে সীতা আগে পাছে দুই মহাবীর ।
তিন জন হইলেন পুরীর বাহির ॥
স্ত্রী-পুরুষ কাঁদে যত অযোধ্যানগরী ।
জানকীর পাছে যায় অযোধ্যার নারী ॥
যে সীতা না দেখিতেন সূর্য্যের কিরণ ।
হেন সীতা বনে যান দেখে সর্বজন ॥
যেই রাম ভ্রমেন সোনার চতুর্দলে ।
হেন প্রভু রাম পথ বহেন ভূতলে ॥
কোথাও না দেখি হেন কোথাও না শুনি ।
হাহাকার করে বৃদ্ধ বালক রমণী ॥
জগতের নাথ রাম যাইবেন বনে ।
বিদায় লইতে যান পিতার চরণে ॥
বুদ্ধি নাই ভূপতির হরিয়াছে জ্ঞান ।
রাম বনে গেলে তাঁর বাঁচিবে কি প্রাণ ?
লজ্জারে পাগল কৈল কৈকেয়ী রাক্ষসী ।
রাম হেন পুত্রে হায় কৈল বনবাসী ॥
মনে বৃষি রাজার সে নিকট মরণ ।
বিপরীত বুদ্ধি হয় এই সে কারণ ॥
জানকী সহিত রাম যান তপোবন ।
রাজ্যস্থখভোগ ছাড়ি চলিল লক্ষণ ॥
পুরীশুদ্ধ সবে ইচ্ছে শ্রীরামের সনে ।
চৌদ্দবর্ষ এক ঠাই থাকে গিয়া বনে ॥
অযোধ্যার ঘর-দ্বার ফেলিবে ভাঙ্গিয়া ।
কৈকেয়ী করুক রাজ্য ভরতে লইয়া ॥

শৃগাল ভল্লুক থাকুক অযোধ্যানগরে ।
মাতা-পুত্রে রাজত্ব করুক একেশ্বরে ॥
এইরূপ শ্রীরামেরে সকলে বাখানে ।
রাজার নিকটে যান দ্রুত তিন জনে ॥
প্রকোষ্ঠ-বাহিরে এক রহে তিন জন ।
আবাস-ভিতরে রাজা করেন ক্রন্দন ॥
ভূপতি বলেন রে কৈকেয়ি ভুজঙ্গিনি ।
তোরে আনি মজ্জিলাম সবংশে আপনি ॥
রঘুবংশ-ক্ষয় হেতু আসিলি রাক্ষসী ।
রাম হেন পুত্রেরে করিলি বনবাসী ॥
কেমনে দেখিব আমি রাম যাবে বন ?
রাম বনে গেলে আমি ত্যজিব জীবন ॥
প্রাণ যাক তাহে মম নাহি কোন শোক ।
আমারে স্ত্রীবশ বলি ঘৃষিবেক লোক ॥
বড় বড় রাজা আমি জিনিলাম রণে ।
দেব দৈত্য গন্ধর্ব কাঁপয়ে মোর বাণে ॥
যেই রাজা জিনিলেক দৈত্য সে সম্বর ।
যারে অর্দ্ধাসনে স্থান দেন পুরন্দর ॥
হেন দশরথ রাজা স্ত্রী লাগিয়া মরে ।
এই অপকীর্ত্তি মম থাকিল সংসারে ॥
স্ত্রীর বশ না হইবে অথ কোন নর ।
আমার মরণে লোক শিখিল বিস্তর ॥
বর্জ্জিবে ভরত তোরে এই অনাচারে ।
আমি বর্জ্জিলাম তোরে আর ভরতেরে ॥
আজি হ'তে তোরে আমি করিছ বর্জন ।
ভরতের না লইব শ্রাদ্ধ বা তর্পণ ॥
থাকি অথ প্রকোষ্ঠেতে তাঁরা তিন জন ।
শুনেন রাজার সর্ব বিলাপ-বচন ॥
রাজার হৃৎখেতে হৃৎখী শ্রীরাম-লক্ষণ ।
রাজার ক্রন্দন দেখি কাঁদে দুই জন ॥

আবাস ভিতরে দেখে লুটায় ভূপতি ।
 হেনকালে উপনীত সুমন্ত্র সারথি ॥
 ষোড়হাতে বার্তা কহে রাজার গোচর ,—
 নিবেদন অবধান কর নৃপবব !
 শ্রীরাম লক্ষণ সীতা যায় আজি বনে ।
 বিদায় লইতে আসিলেন তিন জনে ॥
 ভূপতি বলেন মন্ত্রি ! নাহি মম জ্ঞান ।
 মহারাণীগণে তুমি আন মোর স্থান ॥
 রাজার পাইয়া আজ্ঞা সুমন্ত্র সারথি ।
 সাত শত মহারাণী আনে শীঘ্রগতি ॥
 সুমন্ত্র রাজাজ্ঞামতে চলিল তখন ।
 শ্রীরাম লক্ষণ সীতা আনে তিন জন ॥
 বন্দনা করেন রাম পিতার চরণে ।
 আজ্ঞা কর বনে যাই মোরা তিন জনে ॥
 কহিলেন নৃপতি করিয়া হাহাকার ।
 মম সঙ্গে দেখা বাছা ! না হইবে আর ॥
 এথা না রহিব আমি না হবে জীবন ।
 তোমার সহিত রাম ! যাব তপোবন ॥
 শ্রীরাম বলেন পিতা ! এ নহে বিহিত ।
 পুত্র সঙ্গে পিতা যায এই কি উচিত ?
 ভূপতি বলেন রাম ! থাক এক রাত্রি ।
 এক রাত্রি একত্র করিব নিবসতি ॥
 ভালমতে দেখিব তোমার সুবদন ।
 পুনর্বার না হইবে রাম-দরশন ॥
 শ্রীরাম বলেন যদি নিশ্চিত গমন ।
 এক রাত্রি লাগি কেন সত্য উল্লঙ্ঘন ॥
 আজি আমি বনে যাব আছে এ নির্বন্ধ ।
 না গেলে বিমাতা মনে ভাবিবেন মন্দ ॥
 আজি হতে অন্ন করিলাম বিসর্জন ।
 বনে গিয়া কল-মূল করিব ভক্ষণ ॥

তারে পুত্র বলি যে কুলের অলঙ্কার ।
 পিতৃসত্য পালিয়া শোধসে পিতৃধার ॥
 ভূপতি বলেন শুন সুমন্ত্র ! বচন ।
 অশ্ব হস্তী সঙ্গে নাও বহুমূল্য ধন ॥
 অরণ্যের মধ্যে আছে বহু পুণ্যস্থান ।
 ব্রাহ্মণ তপস্বী দেখি করিও প্রদান ॥
 ধন দিতে রাজা যদি করেন আশ্বাস ।
 কৈকেয়ী অন্তরে ছুঃখী ছাড়িল নিশ্বাস ॥
 সর্বাঙ্গ হইল শুষ্ক ম্লান হল মুখ ।
 রাজারে পাড়িল গালি পেয়ে মনে ছুঃখ ॥
 ভরতেরে রাজ্য দিতে করি অঙ্গীকার ।
 কুটিল হৃদয় ! কর অশুভা তাহার ॥
 তব বংশে ছিলেন সগর মহাশয় ।
 অসমঞ্জ পুত্রে বর্জে প্রধান তনয় ॥
 রামেরে বর্জিতে আজি মনে লাগে ব্যথা ।
 আপনি করিয়া সত্য করিছ অশুভা ॥
 এত যদি ভূপতির কৈকেয়ী বলিল ।
 শুন পাপীয়সি ! তবে নৃপতি বলিল ॥
 সগরের পুত্র অসমঞ্জ ছুরাচার ।
 গলা টিপে বালকেরে করিত সংহার ॥
 তার মাতাপিতা ছুঃখ পায় পুত্রশোকে ।
 জানাইল সগর রাজারে প্রজালোকে ॥
 তব রাজ্য ছাড়ি রাজা যাব অশু দেশ ।
 অসমঞ্জ প্রজাগণে দেয় বড় ক্রেশ ॥
 কেমনে থাকিবে প্রজা যে দেশে এমন ।
 প্রজা যদি চাও পুত্রে করহ বর্জন ॥
 অসমঞ্জে বর্জে রাজা লোক-অহুরোধে ।
 শ্রীরামেরে বর্জি আমি কোন্ অপরাধে ?
 জগতের হিত রাম জগৎ-জীবন !
 হেন রামে কে বলিবে যাও তুমি বন ?

তখন বলেন রাম পিতৃবিগ্ৰহে ।
 ভাল যুক্তি মাতা বলিলেন তব স্থানে ॥
 রাজ্য ছাড়ি যাহার যাইতে হয় বন ।
 অশ্ব হস্তী ধনে তার কোন্ প্রয়োজন ?
 গাছের বাকল পরি দণ্ড করি হাতে ।
 জ্ঞানকী লক্ষণ মাত্র যাইবেক সাথে ॥
 বাকল পরিবে রাম কৈকেয়ী তা শুনে ।
 বাকল রাখিয়াছিল দিল ততক্ষণে ॥
 বাকল আনিয়া দিল শ্রীরামের হাতে ।
 কাঁদেন বাকল দেখি রাজ্য দশরথে ॥
 লক্ষণের সীতার বাকল তিনখানি ।
 বোদন করেন দে'খে যতেক রমণী ॥
 অশ্রুজল সবাকার করে চল চল ।
 কেমনে পরিবে সীতা গাছের বাকল ?
 হরি হরি স্মরণ করয়ে সর্বলোকে ।
 বজ্রঘাত হয় যেন ভূপতির বৃকে ॥
 সবে বলে কৈকেয়ী ! পাষণ তোর হিয়া ।
 তিলেক না হয় দয়া রামেরে দেখিয়া ?
 এক জনে দংশিয়া দংশিলি তিন জনে ।
 লক্ষণ সীতারে কেন পাঠাইলি বনে ?
 পিতৃসত্য পালিতে শ্রীরাম যান বন ।
 জ্ঞানকী লক্ষণ যান কিসের কারণ ?
 বধুর বাকল দেখি রাজ্য ক্রন্দন ।
 পাত্র মিত্র বলে সীতা পরন বসন ॥
 পিতৃসত্য পুত্র পালে বধুর কি দায় ?
 পতিব্রতা সীতাদেবী পিছে কেন যায় ?
 নানা রঙ্গে পূর্ণিত যে রাজ্য ভাণ্ডার ।
 সুমন্ত্র শুনিয়া আনে দিব্য অলঙ্কার ॥
 জ্ঞানকী পরেন তাড় তোড়ন নুপুর ।
 মকর-কুণ্ডল হার অপূর্ব কেয়ুর ॥

মণিময় মালা আর বিচিত্র পাশুলি ।
 হীরক-অঙ্গুরী তাতে শোভিত অঙ্গুলী ॥
 ছুই হাতে শঙ্খ তাঁর অদ্ভুত নিৰ্ম্মাণ ।
 করিলেন যতেক ভূষণ পরিধান ॥
 পট্টবস্ত্র পরিলেন অতি মনোহর ।
 ত্রৈলোক্য জিনিয়া রূপ ধরিল সুন্দর ॥
 যেমন ভূষণ তাঁর তেমনি আকার ।
 শ্বশুরে জ্ঞানকী দেবী করে নমস্কার ॥
 বদায় লইয়া সীতা শ্বশুর-চরণে ।
 রহে যোড়হাতে শাশুড়ীর বিগ্ৰহে ॥
 কোশল্যা বলেন, সীতা ! শুন সাবধানে ॥
 স্বামিসেবা সতত করিবে রাত্রি-দিনে ॥
 নৃপতির বধু তুমি রাজ্যের কুমারী ।
 তোমার আচরে আচরিবে অশ্রু নারী ॥
 নির্ধন হউক স্বামী অথবা সধন ।
 স্বামী বিনা স্ত্রীলোকের নাহি অশ্রু ধন ॥
 সীতা বলিলেন, মা গো ! শ্বশুর ঠাকুরাণি !
 স্বামিসেবা করিতে যে আমি ভাল জানি ॥
 স্বামিসেবা করি মাত্র এই আমি চাই !
 সেকারণে ঠাকুরাণী বনবাসে যাই ॥
 তাঁর কথা শুনিয়া কহেন মহারাণী ।
 তোমা হেন বধু আমি ভাগ্য বলি মানি ॥
 বধুরে প্রবোধ দিয়া বৃন্দান শ্রীরামে ।
 সতর্ক থাকিও রাম । মুনির আশ্রমে ॥
 জ্ঞানকীর রূপে চমৎকৃত ত্রিভুবন ।
 সাবধানে থেকো রাম । ভয়ানক বন ॥
 সুমিত্রা বলেন, শুন তনয় লক্ষণ !
 দেবজ্ঞান রামেরে করিও সর্বক্ষণ ॥
 জ্যেষ্ঠভ্রাতা পিতৃতুল্য সর্বশাস্ত্রে জানি ।
 আমার অধিক তব সীতাঠাকুরাণী ॥

শ্রীরাম বলেন, শুন সুমিত্রা জননি !
 আশীর্বাদ কর বনবাসে যাই আমি ॥
 বনেতে তিনেতে তিন থাকিব দোসর ।
 ত্রিভুবনে আমার কাহারে নাই ডর ॥
 বন্দন সবারে রাম যত রাজবাণী ।
 সবাকার ঠাই রাম মাগেন মেলানি ॥
 নমস্কার করেন কৈকেয়ী চরণে ।
 অমুমতি কব মাতা । যাই আমি বনে ॥
 ভাল মন্দ বলিযাছি নিরদয় বাণী ।
 মনে কিছু না করিও দেহ মা মেলানি ॥
 পাপিষ্ঠা কৈকেয়ী তাহে প্রতি ক্রুরমতি ।
 ভাল মন্দ না বলিল শ্রীবামের প্রতি ॥
 মায়েরে সঁপেন রাম নুপতিব পায় ।
 যাবৎ না আসি পিতা । পালিও মাতাষ ॥
 রাজা বলিলেন, যদি রহে এ জীবন ।
 তবে ত তোমাব বাক্য কবিব পালন ॥
 আমার এ আজ্ঞা রাম ! না কর লঙ্ঘন ।
 তিন দিন রথে চড়ি করহ গমন ॥
 রাজাজ্ঞায় রথ আনে সুমন্ত্র সারথি ।
 তিন দিন রথে যাইবেন রঘুপতি ॥
 শ্রীরাম লক্ষ্মণ সীতা উঠিলেন রথে ।
 তোলেন আযুধ নানা লক্ষ্মণ তাহাতে ॥
 রাজ্য খণ্ড ছাড়িয়া শ্রীরাম যান বনে ।
 পাছে পাছে ধায় যত স্ত্রীপুরুষগণে ॥
 ভাঙ্গিল সকল রাজ্য অযোধ্যানগরী ।
 শ্রীরামের পাছে ধায় সব অন্তঃপুরী ॥
 ডাক দিয়া সুমন্ত্রে বলিছে সর্বজন ;—
 রথ রাখ রথ রাখ দেখি চলানন ॥
 শ্রীরাম বলেন, শুন সুমন্ত্র সারথি ।
 দেখিতে না পারি আমি পিতার দুর্গতি ॥

রথের করাও তুমি ত্বরিতে গমন ।
 পিতার সহিত যেন না হয় দর্শন ॥
 সুমন্ত্র বলিল, আজ্ঞা না করিব আন ।
 এক বাক্য বলি আমি কর অবধান ॥
 ভাঙ্গিল রাজ্যের সঙ্গে অযোধ্যানগরী ।
 রথের পশ্চাতে এই দেখ সর্বপুরী ॥
 রাজ্যের সহিত যদি হয় দর্শন ।
 রবে না দেশেতে লোক করিবে গমন ॥
 শ্রীরাম বলেন, বলি, সুমন্ত্র ! তোমারে ।
 প্রয়োজন নাহি মোর রাজ্য পরিবারে ॥
 মম বাক্য তুমি না পারিবে লজ্জিবারে ।
 শীঘ্র রথ চালহ না দেখা দিব কারে ॥
 শ্রীরামের আজ্ঞামতে সুমন্ত্র সারথি ।
 রথখান চালাইল পবনের গতি ॥
 কত দূরে গিয়া রথ হ'ল অদর্শন ।
 ভূমিতে পড়েন রাজা হয়ে অচেতন ॥
 রাজ্যেরে ধরিয়া তোলে অমাত্য সকল ।
 শরীরের ধূলি ঝাড়ে মুখে দেয় জল ॥
 এক দিন শোকে তাঁর মূর্তি হ'ল ম্লান ।
 রাজ্যের জীবন নাই করে অহুমান ॥
 রাজ্যেরে ধরিয়া সবে লয়ে গেল দেশ ।
 অগ্নঃপুরমধ্যে তাঁরে করায় প্রবেশ ॥
 গড়াগড়ি দশরথ যান ভূমিতলে ।
 হেনকালে কৈকেয়ী রাজ্যেরে ধরি তোলে ॥
 নরপতি বলেন, ছুঁস না পাতকিনি !
 স্ত্রী হইয়া স্বামীকে বধিলি চণালিনি !
 প্রথমে যখন ছিলি নবীনা যুবতী ।
 দিবারাত্র থাকিতিসু আমার সংহতি ॥
 তাহার কারণ এই হইল প্রকাশ ।
 রাম ছাড়া করিয়া করিলি সর্বনাশ ॥

গেলেন শোকাক্ত রাজা কোশল্যার ঘর ।
 দৌহার হইল শোক একই সোসর ॥
 রাত্রি-দিন নাহি ঘুচে দৌহার ক্রন্দন ।
 এক শোকে কাতর হ'লেন দুই জন ॥
 মুনি বেদ ছাড়িলেন যোগী ছাড়ে যোগ ।
 পাবক আছতি ছাড়ে প্রজা ছাড়ে ভোগ ॥
 মাতঙ্গ আহার ছাড়ে ঘোড়া ছাড়ে ঘাস ।
 প্রজার ভোজন নাই করে উপবাস ॥
 যামিনীতে কামিনী না যায় পতি-পাশ ।
 সংসার হইল শূন্য সকলে নিরাশ ॥
 রাত্রি দিন কান্দে লোক করে জাগরণ ।
 গেলেন তমসাকূলে শ্রীরাম লক্ষণ ॥
 নানা বনফল দেখি সে নদীর কূলে ।
 রাজহংস ক্রীড়া করে তমসার জলে ॥
 স্নুমস্তের প্রতি আঞ্জা করিলেন রাম ।
 তমসার কূলে আজি করিব বিশ্রাম ॥
 রথ-অশ্ব স্নান করাইল তার জলে ।
 জল পান করাইয়া বাঞ্ছে তার কূলে ॥
 অস্তগিরি-গত রবি বেলার বিরাম ।
 তমসার জলে স্নান করেন শ্রীরাম ॥
 লক্ষণ বৃক্ষের তলে বিস্তারিল পাতা ।
 করিলেন তাহাতে শয়ন রাম সীতা ॥
 কমণ্ডলু ভরি জল আনিল লক্ষণ ।
 রাম-সীতা প্রক্ষালন করেন চরণ ॥
 হাতে ধনু লক্ষণ রহিল জাগরণে ।
 শ্রীতি পাইলেন রাম লক্ষণের গুণে ॥
 তমসার কূলেতে বঞ্চে এক রাত্তি ।
 প্রভাতে যোগায় রথ স্নুমস্ত সারথি ॥
 প্রাতঃস্নান আদি করি নিয়ম আচার ।
 হইলেন শ্রীরাম তমসানদী পার ॥

যেখানে যেখানে শ্রীরামের রথ রয় ।
 তথাকার লোক আসি দেয় পরিচয় ॥
 বৃদ্ধকালে দশরথ বাধ্য বনিতার ।
 হেন পুত্র পুত্রবধু পাঠায় কাস্তার ॥
 তমসা ছাড়িয়া আর গোমতী প্রভৃতি ।
 নদী পার হইলেন রাম মহামতি ॥
 জলে হংস কেলি করে অতি সুশোভন ।
 দেখি আপ্যায়িত হন শ্রীরাম-লক্ষণ ॥
 শ্রীরাম বলেন সীতা ! সর্বত্র বিদিত ।
 ইক্ষাকুর রাজ্য এই দেখ সুশোভিত ॥
 এই দেশে ইক্ষাকু ধরিল ছত্রদণ্ড ।
 মম পূর্বপুরুষের দেখ রাজ্যখণ্ড ॥
 যথা যথা যান রাম প্রসন্ন হৃদয় ।
 সে দেশের যত লোক আসি নিবেদয় ॥
 তোমার বিহনে রাম রাজ্যের বিনাশ ।
 কোন্ বিধি সৃজিল তোমার বনবাস ?
 সবাকারে রামচন্দ্র দিলেন মেলানি ।
 ভালবাস আমারে তোমরা ভাল জানি ॥
 করিয়া রাজ্যের নিন্দা সবে যায় ঘরে ।
 পিতৃনিন্দা শুনি রাম বিমর্ষ অন্তরে ॥
 পক্ষী হেন উড়ে রথ যায় নানা দেশ ।
 কোশলের রাজ্যে রাম করেন প্রবেশ ॥
 শ্রীরাম বলেন, শুন জানকী সুন্দরি !
 মম মাতামহের আছিল এই পুরী ॥
 পুত্রবৎ করিলেন প্রজার পালন ।
 গঙ্গাতীরে প্রদানিল ব্রাহ্মণ শাসন ॥
 নগরের মধ্যে গঙ্গা শোভে কৃতূহলে ।
 সারি সারি যজ্ঞকুণ্ড তার দুই কূলে ॥
 কদলী গুবাক নারিকেল আত্র আর ।
 দুই তীরে রোপিয়াছে শোভিত অপার ॥

দুই কূলে বিপ্রগণ করে বেদধ্বনি ।
 দুই কূলে স্নান করে যত ঋষি মুনি ॥
 সুমন্ত্রের প্রতি তবে বলেন শ্রীরাম ;—
 গঙ্গাতীরে রহি আজি করিব বিশ্রাম ॥
 সুমন্ত্র লক্ষণ দৌছে দিল অনুমতি ।
 রথ হ'তে নামিলেন চারি মহামতি ॥
 রাম সীতা লক্ষণ বসেন বৃক্ষমূলে ।
 সুমন্ত্র চালায় অথ জাহুবীর কূলে ॥
 ভাস্কর পশ্চিমে যান বেলা অবশেষে ।
 তখন গেলেন রাম শৃঙ্গবের দেশে ॥
 শৃঙ্গবের দেশ দেখি রাম হৃষ্টমতি ।
 লাগিলেন বলিতে শ্রীলক্ষণের প্রতি ॥
 গুহক চণ্ডাল হেথা আছে মম মিত্র ।
 আমারে পাইলে হবে আনন্দিতচিত্ত ॥
 শ্রীরাম বলেন, শুন সুমন্ত্র সারথি !
 মিত্রের বাটীতে আমি থাকি এক রাত্তি ॥
 করিব শুনিব বাক্য দৌছে দৌহাকার ।
 বিশেষতঃ জানিব পথের সমাচার ॥
 নানাবিধ ফল খাব কদলী কাঁটাল ।
 সুরঙ্গ নারঙ্গী আদি পাইব রসাল ॥
 রাম বনে বাইতে রহেন সেই দেশে ।
 গাইল অযোধ্যাকাণ্ড কবি কৃষ্ণিবাসে ॥

শ্রীরামচন্দ্রের সহিত গুহকের সন্দর্শন ও জয়ন্ত
 কাকের এক চক্ষু বিদ্ধকরণ ।

ষোড়হাত্ত করি বলে সুমন্ত্র সারথি ;—
 আমাকে কি আজ্ঞা কর করি অবগতি ॥
 শুনিয়া বলেন রাম কমললোচন ।
 রথ লয়ে দেশে তুমি করহ গমন ॥

তিন দিন রথে আসি পিতার আদেশে ।
 তিন দিন গত হ'ল যাও তুমি দেশে ॥
 আর তিন দিনে যাবে অযোধ্যানগর ।
 সকল করিবে গিয়া পিতার গোচর ॥
 বৃদ্ধ পিতা ছাড়ি আসিলাম দেশান্তরে ।
 এমত দারুণ শোক কিমতে পাসরে ?
 পিতৃসেবা না করিলাম থাকিয়া নিকটে ।
 কোথাও না দেখি হেন কোন জনে ঘটে ॥
 প্রাণের ভারত ভাই থাকে সে বিদেশে ।
 ভারতে আনিয়া রাজ্য করিবে হরিষে ॥
 যত দিন ভারত এ কথা নাহি শুনে ।
 তত দিন হবে মাতামহের ভবনে ॥
 মায়ের চরণে জানাইবে নমস্কার ।
 আমা হেতু শোক যেন না করেন আর ॥
 রাত্রিদিন সেবা যেন করেন পিতার ।
 মোরে পাসরিবে মাতা দেখিয়া সংসার ॥
 পরিহার জানাইবে কৈকেয়ীর প্রতি ।
 তাঁর কিছু দোষ নাই সব দৈবগতি ॥
 পিতার চরণে জানাইও সমাচার ।
 অস্থির হইলে তিনি মজিবে সংসার ॥
 তুমি হেন মহাপাত্র সুমন্ত্র সারথি !
 ইষ্ট-কুটুম্বের কাছে জানাবে মিনতি ॥
 রামেরে সুমন্ত্র কহে করিয়া ক্রন্দন ।
 পুনঃ কত দিনে রাম ! হবে দরশন ?
 বিদায় হইয়া যায় সুমন্ত্র কান্দিয়া ।
 অতি শীঘ্রগতি গেল রথ চালাইয়া ॥
 সুমন্ত্রে বিদায় দিয়া শ্রীরাম চিন্তিত ।
 মঞ্জণা করেন সীতা লক্ষণ সহিত ॥
 হেথা হ'তে অযোধ্যা নিকট বড় পথ ।
 এখানে থাকিলে নিতে আসিবে ভারত ॥

স্তম্ভ কহিবে রাখি শৃঙ্গবের পুরে ।
 শুনিলে ভরত নিতে আসিবে সত্তরে ॥
 যাবৎ স্তম্ভ পাত্র নাহি যায় দেশে ।
 গঙ্গাপার হয়ে চল যাই বনবাসে ॥
 গৃহকের প্রতি তবে বলেন শ্রীরাম ।
 চিত্রকূট শৈলে গিয়া করিব বিজ্ঞাম ।
 দেখিয়া আতঙ্ক হয় গঙ্গার তরঙ্গ ।
 ভরা পার কর যেন সত্যে নহে ভঙ্গ ॥
 সাত কোটি নৌকা তার গৃহক চণ্ডাল ।
 আনিল সোনার নৌকা সোনার কেবাল ॥
 গৃহ বলে করিলাম তরণী সাজন ।
 এক রাত্রি রাম ! হেথা বঞ্চ তিন জন ॥
 এক রাত্রি থাকি রাম ! তোমার সহিত ।
 শ্রীরাম বলেন মিত্র ! এ নহে উচিত ॥
 এখানে রহিতে আজি মনে শঙ্কা পায় ।
 ভরত আসিয়া পাছে প্রমাদ ঘটায় ॥
 প্রাতঃকালে গৃহ নৌকা করিল সাজন ।
 পার হয়ে কূলেতে উঠেন তিন জন ॥
 মাঝে সীতা আগে পাছে দুই মহাবীর ।
 দুই ক্রোশ পথ বাহি যান গঙ্গাতীর ॥
 শ্রীরাম বলেন ভরদ্বাজের নিকটে ।
 আজি বাসা করি গিয়া থাকি নিঃসঙ্কটে ॥
 মুনিগণে বেষ্টিত হইয়া ভরদ্বাজ ॥
 তারাগণমধ্যে যেন শোভে দ্বিজরাজ ॥
 হেনকালে সেখানে গেলেন তিন জন ।
 তিন জনে বন্দিলেন মুনির চরণ ॥
 শ্রীরাম বলেন শুন মুনি মহাশয় ।
 তিন জন তব ঠাঁই কহি পরিচয় ॥
 দশরথরাজ পুত্র মোরা দুই জন ।
 শ্রীরাম আমার নাম কনিষ্ঠ লক্ষণ ॥

পিতৃসত্য পালিতে হয়েছি বনবাসী ।
 জনককুমারী সীতা সহিত শ্রেয়সী ॥
 রামকথা শুনি মুনি উঠেন সজ্জমে ।
 পাছ অর্ঘ দিয়া পূজা করেন শ্রীরামে ॥
 মুনি বলিলেন, তুমি বিষ্ণু-অবতার ।
 বিষ্ণু আরাধনে তপ করয়ে সংসার ॥
 যাঁর তপ আরাধন করে মুনিগণে ॥
 সেই বিষ্ণু আসিলেন আমার ভবনে ॥
 শ্রীরাম লক্ষণ লক্ষ্মী দেখি তিন জনে ।
 আপনারে ধন্য বলি মানি এত দিনে ॥
 গঙ্গা-যমুনার মধ্যে আমার বসতি ।
 বনবাস বঞ্চ এথা থাকিব সংহতি ॥
 শ্রীরাম বলেন মুনি ! অযোধ্যা সন্নিধি ।
 অযোধ্যার লোকেরা আসিবে নিরবধি ॥
 এথা হ'তে কোন্ স্থান হয় ত নির্জন ।
 যমুনার পারে সে অদ্বুত হয় বন ॥
 কহ মুনি ! কোথায় করিব নিবসতি ?
 শুনি ভরদ্বাজ কহে শ্রীরামের প্রতি ॥
 যথা মুনিগণ বসে বটবৃক্ষতলে ।
 মুগ পক্ষী বনজন্তু আছে কুতূহলে ॥
 নানা ফল-মূল পাবে বড়ই সুস্বাদ ।
 তপোবন দেখি রাম ! ঘৃচিবে বিষাদ ॥
 মুনি সকলের সঙ্গে থাক সেই দেশ ।
 ভরত তোমার তথা না পাবে উদ্দেশ ॥
 এই দেশে নাহি রাম ! নৌকার সঞ্চার ।
 ভেলা বান্ধি যমুনা হও তুমি পার ॥
 ত্রিশ হস্ত যমুনা আড়েতে পরিসর ।
 নিম্নেতে না জানে লোক গভীর বিস্তর ॥
 এক রাত্রি রাম ! হেথা বঞ্চ তিন জন ।
 কালি তুমি যাইও মুনির তপোবন ॥

এথা হ'তে তপোবন ছুইটি যোজন।
 ছুই প্রহরের মধ্যে যাবে তিন জন ॥
 সেইখানে শ্রীরাম বঞ্জন এক রাতি ।
 বিদায় লইয়া রাম যান শীঘ্রগতি ॥
 উভয় বীরের হাতে দিব্য ধনুঃশর ।
 মধ্যে সীতা ছুই পার্শ্বে ছুই ধনুর্ধর ॥
 অগ্রে রাম যান পাছে শ্রীরামরমণী ।
 সজল জলদ সহ যেন সৌদামিনী ॥
 জয়ন্ত নামেতে কাক ছিল সে আকাশে ।
 দেখিয়া সীতার রূপ আসে সীতা-পাশে ॥
 অচেতন হইল ধরিতে নারে মন ।
 ছুই নখে আঁচড়ে সীতার ছুই স্তন ॥
 উড়িয়া চলিল কাক পাইয়া তরাস ।
 ছ' মাসের পথ গেল পর্বত কৈলাস ॥
 ডাকেন জনকসুতা ভয়ে উচ্চৈঃস্বরে ।
 শ্রীরাম বলেন ভাই ! সীতাকে কে মারে ॥
 শুনিয়া রামের কথা কহেন লক্ষ্মণ,—
 সীতারে প্রহারে হেন আছে কোন্ জন ?
 সুমিত্রার অধিক সীতা ঠাকুরাণী মা ।
 পলাইয়া গেল কাক আঁচড়িয়া যে গা ॥
 দেখিতে না পাই কাক গেল কোন্‌খানে ।
 বাণেতে বিক্রিয়া ভারে মারিব পরাণে ॥
 হেনকালে রামচন্দ্রে বলে দেবী সীতা ।
 আঁচড়িয়া গেল কাক হয়েছে ব্যথিতা ॥
 কাক মারিবারে রাম পূরেন সন্ধান ।
 যে দেশে চলিল কাক তথা যায় বাণ ॥
 কৈলাস ছাড়িয়া কাক স্বর্গপুরে যায় ।
 মারিতে রামের বাণ পাছু পাছু ধায় ॥
 ইন্দ্রের নিকটে কাক লইল শরণ ।
 রামের ঐষিক বাণ হইল ব্রাহ্মণ ॥

ব্রাহ্মণ-বেশেতে গেল সে ইন্দ্রের ঠাই ।
 কহিলেন আমি সে জয়ন্ত কাক চাই ॥
 করিয়াছে মন্দ কর্ম বধিব জীবন ।
 রাখিবে যে জন কাক তাহারি মরণ ॥
 রাখিতে নারিল কাকে দেব পুরন্দর ।
 আনিয়া দিলেন কাকে বাণের গোচর ॥
 জয়ন্তরে দেখি রোষে শ্রীরামের বাণ ।
 বিক্রিয়া করিল তার এক চক্ষু কাণ ॥
 শ্রীরামের কাছে দিল বিক্রি এক আঁখি ।
 করুণাসাগর রাম না মারেন পাখী ॥
 শ্রীরাম বলেন সীতা ! দেখ অপমান ।
 যে চক্ষু দেখিল সেই চক্ষু হৈল কাণ ॥
 অপমান পেয়ে কাক গেল নিজ দেশে ।
 রচিল অযোধ্যাকাণ্ড কবি কৃষ্ণিবাসে ॥

—
 দশরথ রাজার মৃত্যু ।

দিবাকর-কিরণ-উত্তাপে উত্তাপিতা ।
 চলিল কাতরা অতি জনকহৃষিতা ॥
 হিংস্রমণ্ডিত তাঁর পায়ের অঙ্গুলি ।
 আতপে মিলায় যেন ননীর পুস্তলী ॥
 মুনির নগর দিয়া যান তিন জন ।
 দেখিতে আইল পথে মুনিপত্নীগণ ॥
 জিজ্ঞাসা করেন সবে জানকীর প্রতি ;—
 পদব্রজে কেন যাও তুমি রূপবতি ?
 অমুভব করি তুমি রাজার নন্দিনী ।
 সত্য পরিচয় দেহ কে বট আপনি ॥
 দুর্ব্বাদলশ্যাম অগ্রে অতি মনোহর ।
 আত্মহুলস্থিত ভুজ রক্ত ওষ্ঠাধর ॥
 সুন্দর বদন দেখি অতি মনোহর ।
 ধনুর্ধারণ করে উনি কে হন তোমার ?

নবীন কমল মুখ ক্রান্ত রচিত ।
 পূলকে মণ্ডিত গণ্ড অল্প বিকসিত ॥
 লাজে অধোমুখী সীতা না বলেন আর ।
 ইন্দ্রিতে বুঝান স্বামী ইনি যে আমার ॥
 কমলিনী সীতা পথে যান ধীরে ধীরে ।
 তবে উপস্থিত হন যমুনার তীরে ॥
 তাহার গভীর জল পাতাল-প্রমাণ ।
 রামের প্রভাবে হয় হাঁটুর সমান ॥
 না জানিয়া ভেলা তাহে বাঞ্ছন লক্ষণ ।
 হাঁটু জল পার হয়ে অক্লেশে গমন ॥
 মুনির চরণ রাম বলেন তখন ।
 রামেরে দেখিয়া মুনি হরষিত-মন ॥
 বলিলেন হে রাম ! আপনি নারায়ণ ।
 তপস্বীর বেশে কেন আইলেন বন ?
 শ্রীরাম বলেন মুনি ! পিতার আদেশে ।
 বিপিনে করিব বাস তপস্বীর বেশে ॥
 তিন জন তথায় রহিলেন অক্লেশে ।
 এ দিকে সুমন্ত্র গিয়া উত্তরিল দেশে ॥
 ছয় দিনে উত্তরিল অযোধ্যানগরে ।
 যোড়হাতে দাণ্ডাইল রাজার গোচরে ॥
 কহিতে লাগিল পাত্র নমস্কার ক'রে ।
 রামে রাখি আসিলাম শৃঙ্গবের পুরে ॥
 সেথা হ'তে আসিলাম রাজা ! তিন দিনে ।
 রাম সীতা লক্ষণ রহেন সেই স্থানে ॥
 বিদায় নিলেন রাম মধুর-বচনে ।
 প্রণিপাত করিয়াছে তোমার চরণে ॥
 রামের যেমন শীল তেমনি বচন ।
 গর্জন করিয়া কিছু বলিল লক্ষণ ॥
 প্রচণ্ড কোদণ্ড ধরি গর্জে যেন কণী ।
 কিছুমাত্র না বলিল সীতা ঠাকুরাণী ॥

এতেক সুমন্ত্র যদি বলিল বচন ।
 পুরীর সহিত সবে করিল ক্রন্দন ॥
 সাত শত মহারানী রাজার ঘরণী ।
 কান্দিয়া বিকল সবে পোহায় রজনী ॥
 কেহ কাহে না সাঙ্ঘ্যে সবে অচেতন ।
 পূর্বকথা রাজার যে হইল স্মরণ ॥
 কোশল্যার ঠাই রাজা কহে পূর্বকথা ।
 মহাজন যাহা বলে না হয় অশ্রুতা ॥
 যুগযাতে প্রবেশিষু সরস্বতী তীরে ।
 অন্ধ মুনি তনয় কলসে জল ভরে ॥
 মম জ্ঞান হ'ল যুগ করে জলপান ।
 পুরিলাম শব্দমাত্র পাইয়া সন্ধান ॥
 সলিল ভরিছে যবে ফুটে বাণ বৃকে ।
 প্রাণ গেলে বলিয়া মুনির পুত্র ডাকে ॥
 কোন্ অপরাধে প্রাণ নিল কোন্ জনে ?
 এতেক শুনিয়া আমি গেলাম সে স্থানে ॥
 মুনিপুত্র বলে রাজা পাড়িলে প্রমাদ ।
 আমারে মারিলে কি পাইয়া অপরাধ ?
 অন্ধ মাতাপিতা আমি পালি রাত্রি-দিনে ।
 মাতাপিতা মরিবেক আমার মরণে ॥
 অন্ধ মাতাপিতা আছে শ্রীফলের বনে ।
 আমা লয়ে রাজা ! তুমি চল সেইখানে ॥
 যাবৎ আমার পিতা নাহি দেন শাপ ।
 আমা লয়ে চল তুমি যথা বৃদ্ধ বাপ ॥
 ইহা বিনা তব আর নাহি প্রতীকার ।
 এতেক বলিল মোরে মুনির কুমার ॥
 অন্ধ বৃদ্ধ-বৃদ্ধা বসিয়াছে সেইখানে ।
 শিশু কোলে করি আমি গেলাম সে বনে ॥
 মুনি বলিলেন রাজা বড়ই নির্জয় ।
 কি দোষে মারিলে বল আমার তনয় ?

আমায়ে লইয়া চল সরযুর কূলে ।
 পুত্রের তর্পণ আমি করি সেইজলে ॥
 মুনি ধরি আনিলাম সরযুর নীরে ।
 পুত্রের তর্পণ করি শাপিল আমারে ॥
 পুত্রশোকে মরিয়া করিল স্বর্গবাস ।
 দেশে আসিলাম আমি পাইয়া তবাস ॥
 সে মুনির বাক্য কভু না হয় খণ্ডন ।
 আজিকার রাত্রে রাণি ! আমার মবণ ॥
 সে অন্ধ মুনির শাপ-ফলে অতঃপরে ।
 ছটফট করে রাজা মুখে বাক্য হরে ॥
 হাহাকার করি রাজা ত্যজিল জীবন ।
 নিদ্রা যায় দশরথ হেন লয় মন ॥
 পুরীর সহিত কাঁদি পোহায় রজনী ।
 রাজার নিকট গেল সাত শত রাণী ॥
 দুই দণ্ড বেলা হয় সূর্যের উদয় ।
 এতক্ষণ নিদ্রা যায় রাজা মহাশয় ॥
 অনন্তর রাজারে করিল মৃতজ্ঞান ।
 নাড়িয়া চাড়িয়া দেখে নাহি তাঁর প্রাণ ॥
 আছাড় খাইয়া পড়ে কদলী যেমনি ।
 রাজার চরণ ধরি কান্দে সব রাণী ॥
 একে পুত্রশোকে রাণী পরম দুঃখিতা ।
 পতিশোকে ততোধিক হইল মূর্ছিতা ॥
 সত্যবাদী রাজা তুমি সত্যে বড় স্থির ।
 সত্য পালি স্বর্গে গেলে ত্যজিয়া শরীর ॥
 সত্য না লজ্বিলে তুমি বড় পুণ্যলোক ।
 স্বর্গবাসী হয়ে এড়াইলে পুত্রশোক ॥
 রাজা স্বর্গে গেল আর রাম গেল বন ।
 দুই শোকে প্রাণ মোর থাকে কি কারণ ?
 ক্রমে গড়াগড়ি যায় কোশল্যা তাপিনী ।
 কোশল্যার বৃদ্ধান বশিষ্ঠ মহামুনি ॥

তোমায়ে বুঝাব কত নহে ত উচিত ।
 মৃত হেতু কাঁদে যত সব অনুচিত ॥
 স্বর্গেতে গেলেন রাজা পালিয়া পৃথিবী ।
 তাঁর ধর্মকর্ম কর তুমি মহাদেবি !
 রাজারে রাখহ করি তৈলমধ্যগত ।
 দেশে আসি অগ্নিকার্য্য করিবে ভরত ॥
 বাসি মড়া হইয়া আছেন মহারাজ ।
 প্রাতঃকালে যুক্তি করে অমাত্য-সমাজ ॥
 সত্য পালি ভূপতি গেলেন স্বর্গবাস ।
 অরাজক হ'ল রাজ্য বড় পাই ত্রাস ॥
 অরাজক রাজ্যের সর্বদা অকুশল ।
 অরাজক পৃথিবীতে নাহি হয় জল ॥
 অরাজক রাজ্যে বৃক্ষে নাহি ধরে ফল ।
 রাজক রাজ্যে ধর্ম সকলি বিফল ॥
 অরাজক রাজ্যে ভৃত্য বশ নাহি রয় ।
 অরাজক রাজ্যে সর্বক্ষণ দস্যুভয় ॥
 অরাজক রাজ্যেতে তুরঙ্গ হস্তী ছোটে ।
 অরাজক রাজ্যেতে প্রজার ধন লোটে ॥
 অরাজক রাজ্যে সদা হয় ডাকা চুরি ।
 অরাজক রাজ্য দেখি বড় ভয় করি ॥
 অরাজক রাজ্যে অশ্রু নৃপতি গরজে ।
 অরাজক রাজ্যে প্রজালোক দুঃখে মজে ॥
 অরাজক রাজ্যে না বন্নিষে পুরন্দর ।
 অরাজক রাজ্যের অশুভ বহুতর ॥
 অরাজক রাজ্যে নারী নাহি রহে পাশে ।
 অরাজক রাজ্যে স্বামী অশ্রু নারী তোষে ॥
 অরাজক রাজ্যে সদা হিতে বিপরীত ।
 অরাজক রাজ্যে থাকা অতি অনুচিত ॥
 রাজ্য করিলেন বৃদ্ধ রাজা মহাশয় ।
 তাঁহার প্রতাপে লোক থাকিত নির্ভয় ॥

স্বর্গ মর্ত পাতাল কাঁপিত তাঁর ডরে ।
 রাজ্যের কুশল ছিল রাজার আদরে ॥
 হেন রাজা বিনা রাজ্য করে টলমল ।
 রাজা হৈলে রাজ্যরক্ষা প্রজার কুশল ॥
 রাজ্য দিতে ভরতেরে সর্ব্ব অঙ্গীকার ।
 ভরতেরে আনি দেশে দেহ রাজ্যভার ॥
 ভরত আছেন মাতামহের বসতি ।
 দূত পাঠাইয়া তাঁরে আন শীঘ্রগতি ॥
 রাজা স্বর্গগত রাম চলিলেন বনে ।
 এত ঘোর প্রমাদ ভরত নাহি জানে ॥
 ভরতেরে না কহিবে এ সব ঘটন ।
 তবে না করিবে সেও দেশে আগমন ॥
 মাতৃদোষ শুনিলে ভরত না আসিবে ।
 পিতৃশোকে মনোহুঃখে দেশান্তরী হবে ॥
 বুঝির সাগর পাত্র মঙ্গলবিশেষে ।
 চলিলেন ভরতেরে আনিবারে দেশে ॥
 করিলেন অনুজ্ঞা বশিষ্ঠ পুরোহিত ।
 ভরতে আনিতে সবে চলিল ষড়িত ॥
 হস্তিনানগরে গেল তৃতীয় দিবসে ।
 পরদিন গেল তারা কুরুঞ্জের দেশে ॥
 নাহারের রাজ্যে গেল ষড়িতগমনে ।
 লক্ষ্মী অধিষ্ঠান সদা জ্ঞান হয় মনে ॥
 রাত্রি দিন সবে পথে চলিল সত্বর ।
 পুনবের রাজ্যে গেল দেখে মনোহর ॥
 আড়িকুল দেশে গেল যেন সুরপুর ।
 কুরুক্ষত্র-বর্জিত লোক স্কন্ধ প্রচুর ॥
 বহুবর্ণ নদী পার হৈল সর্ব্বজন ।
 যার ছই কূলে বৈসে অনেক ব্রাহ্মণ ॥
 নদ নদী কন্দর হইল বহু পার ।
 বহু দেশ-দেশান্তর এড়ায় অপার ॥

গিরিরাজ দেশেতে কেকয় রাজা বৈসে ।
 উত্তরিল গিয়া পাত্র পঞ্চম দিবসে ॥
 রাত্রি-দিন পথশ্রমে হইয়া বিকল ।
 রন্ধন ভোজন করে পেয়ে রম্যস্থল ॥
 ভরতের সঙ্গে নাহি হয় দরশন ।
 পথশ্রমে নিদ্রা যায় হয়ে অচেতন ॥
 কুন্তিবাস পণ্ডিতের বাণী অধিষ্ঠান ।
 রচিল অযোধ্যাকাণ্ড অমৃত সমান ॥

ভরতের গিত্ত্বশ্রদ্ধাকরণানন্তর রামকে বন হইতে
 গৃহে আনিবার জন্য গমন এবং
 অযোধ্যায় প্রত্যাগমন ।

নিদ্রাগত ভরত পালঙ্কের উপরে ।
 উঠেন কুশল দেখি শঙ্কিত অন্তরে ॥
 প্রভাতে ভরত আসি বসেন দেওয়ানে ।
 আইল অমাত্যগণ তাঁর সম্ভাষণে ॥
 যথাযোগ্যে নমস্কার করে পাত্রগণ ।
 ব্রাহ্মণ-পণ্ডিত করে শুভাশীর্ব্বচন ॥
 মিত্রগণ আসিয়া আলাপ করে কত ।
 ইতরে সম্ভাষণ করে ব্যবহারমত ॥
 ভরত বিষন্ন অতি মুখে নাহি শব্দ ।
 নিশ্বাস প্রবল বহে রছে অতি স্তব্দ ॥
 ভরতেরে জিজ্ঞাসা করেন পাত্রগণ ।
 শুনিয়া ভরত বাক্য বলেন তখন ;—
 কুশল দেখেছি আজি রাত্রি অবশেষে ।
 যেন চন্দ্র-সূর্য্য খসি পড়িল আকাশে ॥
 স্বপ্নে এক বৃদ্ধ আসি কহিল বচন ।
 শ্রীরাম লক্ষ্মণ সীতা গিয়াছেন বন ॥
 দেখিলাম মৃত পিতা তৈলের ভিতর ।
 এই স্বপ্ন দেখি আমি কল্পিত-অন্তর ॥

চারি ভাই আর পিতা এই পাঁচ জন ।
 পাঁচের মধ্যেতে দেখি পিতার মরণ ॥
 ভরতের কথা শুনি সবাকার ত্রাস ।
 পাত্র মিত্র ভরতেরে করিছে আশ্বাস ॥
 দেখিয়াছ কুম্বপন নৃপতিকুমার ।
 গুনহ ভরত ! কহি তার প্রতীকার ॥
 দেবতার পূজা তুমি কর সাবধানে ।
 ত্রাস্কাণ দরিজে তুষ্ট কর নানা দানে ॥
 ইহা বিনা ভরত ! নাহিক উপদেশ ।
 দান দ্বারা তোমার ঘৃচিবে সৰ্ব্বক্লেশ ॥
 পাত্র মিত্র করিলেক এতেক মঙ্গলা ।
 স্নান করি ভরত আনেন দ্রব্য নানা ॥
 পূজিলেন আগে দেব দিয়া উপহার ।
 করেন ভরত দান সকল ভাণ্ডার ॥
 ভরতের যত ছিল ধনের ভাণ্ডার ।
 দিলেন সকল দ্বিজে সীমা নাহি তার ॥
 সকল ভাণ্ডার শূন্য নাই আর ধন ।
 তথাপি তাঁহার কিছু স্থির নহে মন ॥
 প্রবল প্রতাপশালী কেকয় ভূপতি ।
 দেওয়ানে বসিল গিয়া যেন সুরপতি ॥
 ভরত বসেন গিয়া ভূপতির পাশে ।
 অযোধ্যার দূত গিয়া তখন প্রবেশে ॥
 কেকয় রাজার প্রতি নত করি মাথা ।
 ভরতের আগে দূত কহে সব কথা ॥
 আসিলাম তোমাকে লইতে সৰ্ব্বজন ।
 ভরত ! সত্বর দেশে কর আগমন ॥
 রাজার নিশান দেখ হাতের অঙ্গুরী ।
 শীঘ্র চল আমরা রহিতে নাহি পারি ॥
 এক দণ্ড না রহিব আছে বড় কাজ ।
 ভরতেরে পাঠাও কেকয় মহারাজ !

কথার প্রবন্ধে তারা কহিল বিশেষ ।
 দেখিতে তোমায় বাঞ্ছা রাজার অশেষ ॥
 গুনিয়া ভরত কিছু না হন প্রতীত ।
 যত স্বপ্ন দেখিলাম সব বিপরীত ॥
 ভরত বলেন, বল পিতার মঙ্গল ।
 শ্রীরাম লক্ষণ ভাই আছেন কুশল ?
 কৈকেয়ী কোশল্যা আর সুমিত্রা জননী ।
 সকলের মঙ্গল বল হে দূত ! গুনি ॥
 দূত বলে, রাজপুত্র ! সবার কুশল ।
 সবারে দেখিবে যদি শীঘ্র দেশে চল ॥
 প্রণাম করিয়া মাতামহের চরণে ।
 হইলেন ভরত বিদায় সেইক্ষণে ॥
 হাতী ঘোড়া দিল রাজা বহুমূল্য ধন ।
 অশন বসন আর নানা আভরণ ॥
 শক্রপু ভরত দৌহে চড়িলেন রথে ।
 কত শত সৈন্য চলে তাঁহার সহিতে ॥
 সূর্য যান অস্তগরি বেলা অবশেষে ।
 হেন কালে সবে তারা অযোধ্যা প্রবেশে ॥
 শ্রীরামের শোকে লোক করিছে ক্রন্দন ।
 অযোধ্যার সৰ্ব্বলোক বিরস বদন ॥
 জিজ্ঞাসেন ভরত হইয়া বিষাদিত ।
 প্রজালোক কাঁদে কেন নহে হরষিত ?
 অনেক দিনের পরে আসিলাম দেশে ।
 কাছে না আইসে কেন কেহ না সস্তাসে ॥
 এত গুনি দূতগণ হেঁট করে মাথা ।
 কেন নাহি কহে কোন ভাল মন্দ কথা ॥
 অযোধ্যার সৰ্ব্বলোক আছে এ নিয়মে ।
 অশুভ সংবাদ নাহি কেহ কোন ক্রমে ॥
 ভরত চিন্তিত অতি মানিয়া বিস্ময় ।
 প্রথমে গেলেন তিনি পিতার আলয় ॥

দেখিল নাহিক পিতা শূণ্ণ নিকেতন ।
 ভরত ভাবিয়া কিছু না পান কারণ ॥
 মৃত্যুকালে দশরথ কোশল্যার ঘরে ।
 তথা তাঁর মৃতদেহ তৈলের ভিতরে ॥
 ভরত পিতার গৃহ শূণ্ণময় দেখি ।
 মায়ের আবাসে ষান হয়ে মনোজ্বলী ॥
 কৈকেয়ী বসিয়া আছে রত্ন-সিংহাসনে ।
 পড়িয়াছে প্রমাদ মনেতে নাহি গণে ॥
 পুত্রের রাজত্ব-লাভে আছে মন-সুখে ।
 ভরত গেলেন তবে মায়ের সম্মুখে ॥
 ভরতেরে দেখিয়া ত্যজিল সিংহাসন ।
 ভরত করেন তাঁর চরণ বন্দন ॥
 মুখে চুস্ব দিয়া রাণী পুত্রে কৈল কোলে ।
 কুশল জিজ্ঞাসা করে তাঁরে কুতূহলে ;—
 কেকয়-ভূপতি পিতা আছেন কুশলে ?
 কুশলে আছেন মম সোদর সকলে ?
 মঙ্গলে আছেন ভাল বিমাতা সকল ?
 পিতৃরাজ্য রাজগিরি দেশের মঙ্গল ?
 ভরত বলেন, মাতঃ ! না হও বিকল ।
 মাতা পিতা ভ্রাতা তব সবার কুশল ॥
 তোমার বান্ধব যত সকল কুশল ।
 তব জনকের ঘরে সকল মঙ্গল ॥
 তুমি যত জিজ্ঞাসিলে দিলাম উত্তর ।
 আমি যে জিজ্ঞাসি তাহা কহ ত সত্বর ॥
 অযোধ্যার রাজ্য কেন দেখি বিপরীত ।
 সকলে বিষণ্ণ কেন নহে হরষিত ?
 চতুর্দিকে লোক কেন করিছে ক্রন্দন ?
 আমারে দেখিয়া কেন করিছে নিন্দন ?
 পিতার আলয়ে কেন না দেখি পিতারে ?
 অযোধ্যানগর কেন পূর্ণ হাহাকারে ?

যে কথা কহিতে কারো মুখে না আইসে ।
 হেন কথা কহে রাণী পরম হরিষে ;—
 সত্যবাদী তব পিতা সত্যে বড় স্থির ।
 সত্য পালি স্বর্গেতে গেলেন সত্যবীর ॥
 শূণ্ণরাজ্য আছে তব পিতার মরণে ।
 ভরত আছাড় খেয়ে পড়েন সে ক্ষণে ॥
 কাটিলে কদলী যেন ভূমেতে লোটায় ।
 ধূলায় পড়িয়া বীর গড়াগড়ি যায় ॥
 মূর্ছাগত ভরত হ'লেন পিতৃশোকে ।
 কাঁদিয়া বিকল তাঁরে দেখি অশ্রু লোকে ॥
 কৈকেয়ী বলিল, পুত্র ! কর অবধান ।
 তোমার ক্রন্দনে মোর বিদরে পরাণ ॥
 সর্বশাস্ত্র জান তুমি ভরত ! অস্তুরে ।
 মাতাপিতা ল'য়ে কেবা কোথা রাজ্য করে ?
 ভরত বলেন, শুনি পিতার মরণ ।
 শ্রীরাম লক্ষ্মণ তাঁরা কোথা হই জন ॥
 মহারাজ রামেরে অর্পিয়া রাজ্যভার ।
 করিবেন আপনি কেবল সদাচার ॥
 এই সব যুক্তি পূর্বে ছিল আমি জানি ।
 তাহার অশ্রুতা কেন কহ ঠাকুরাণী !
 অযুত বৎসর জানি পিতার জীবন ।
 নয় হাজার বর্ষে তাঁর মৃত্যু কি কারণ ?
 রাজার মরণে তব নাহিক বিষাদ ।
 অনুমানে বুঝি তুমি করেছ প্রমাদ ॥
 রাজকণ্ঠ কৈকেয়ী বাড়িছে নানা সুখে ।
 কত শত কথা বলে যত আসে মুখে ॥
 রাম বনে গেলেন লক্ষ্মণ তার সাথে ।
 মনে কি করিয়া সীতা গেলেন পশ্চাতে ॥
 ভরত বলেন, কেন রাম ষান বনে ?
 পরাণ বিদরে মাতা ! তোমার বচনে ॥

হরিলেন কার ধন কার বা সুন্দরী ?
 কোন্ দোষে হইলেন রাম বনচারী ?
 কৈকেয়ী সকল কহে ভরতের স্থানে ।
 রামের অশেষ গুণ প্রথমে বাখানে ॥
 ভকত্তবৎসল রাম ধর্মেতে তৎপর ।
 জনক-জননী প্রাণ গুণের সাগর ।
 শ্রীরাম হইলে রাজা সবার কোঁতুক ।
 রামের প্রসাদে লোক পায় নানা সুখ ॥
 কালি রাম রাজা হবে আজি অধিবাস ।
 হেনকালে রামেরে দিলাম বনবাস ॥
 তোমারে বাজ্ঞ দিয়া রাম গেল বন ।
 হা রাম বলিয়া রাজা ত্যজিল জীবন ॥
 মাতৃঋণ পুত্র কভু শুধিতে না পারে ।
 রাম লয়েছিল রাজ্য দিলাম তোমারে ॥
 রাজ্য হয়ে রাজ্য কর বস রাজ-পাটে ।
 রাজলক্ষ্মী আছে পুত্র ! তোমার ললাটে ॥
 ঘায়েতে লাগিলে ঘা যেন বড় জ্বলে ।
 ভরত তেমন জ্বালাতন হয়ে বলে ;—
 নিজগুণ বল মাতা ! আপনার মখে ।
 আপনি মজিলে মাতা ! ডু বিলে নরকে ॥
 রাজকূলে জন্মিলে গুনিলে কোনখানে ?
 কনিষ্ঠ হইবে রাজা জ্যেষ্ঠ বিচ্যমানে ?
 তব পিতা পিতামহ করে ধর্মকর্ম ।
 সে বংশেতে কেন হৈল রাক্ষসীর জন্ম ?
 নিশাচরী হয়ে তুমি হইলে মানুষী ।
 রঘুবংশ ক্ষয় হেতু হইলে বাক্ষসী ॥
 শ্রীরামের শোকে রাজা তজ্যেন জীবন ।
 তুমি কেন শ্রীরামেরে পাঠাইলে বন ?
 রাজ্যের প্রসাদে তব এতেক সম্পদ ।
 তিনকুল মজাইলে স্বামী করি বধ ॥

পূর্বজন্মে করিলাম কত কদাচার ।
 সেই পাপে তব গর্ভে জন্ম আমার ॥
 মা হইয়া তনয়েরে দিলে এত শোক ।
 ইচ্ছা হয় কাটিয়া পাঠাই পরলোক ॥
 যেমন পরশুরাম কাটিল মায়েরে ।
 তেমনি করিতে বাঞ্ছা কিন্তু মরি ডরে ॥
 রাম পাছে বর্জেন বলিয়া মাতৃঘাতী ।
 তবে ত নরকে মম হবে নিবসতি ॥
 ভরত জ্বলন্ত অগ্নি তুল্য ক্রোধে জ্বলে ।
 দেখিয়া কৈকেয়ী তবে যায় অস্থ স্থলে ॥
 যাইতে যাইতে রাণী করেন বিবাদ ।
 কার লাগি করিলাম এতেক প্রমাদ ?
 আসিলেন শক্রপ করিতে সন্তাষণ ।
 ভরতের ক্রন্দনে কান্দেন দুই জন ॥
 ভাই ভাই বলিয়া ভরত নিল কোলে ।
 দুজনার অঙ্গ ভিজে নয়নের জলে ॥
 অমুমাণে বঝিলেন কুঁজীর এ ক্রিয়া ।
 কহিতে লাগিল দৌহে কুপিত হইয়া,—
 রাজা নিজ চত্রদণ্ড রামে প্রদানিল ।
 কোথা হতে কুঁজী চেড়ী প্রমাদ পাড়িল ?
 পাইলে কুঁজীর দেখা বধিব জীবন ।
 বিধির নিবন্ধ কুঁজী এল সেইক্ষণ ॥
 শোভা পায় পটবস্ত্রে আর আভরণে ।
 সর্বত্র ভূষিতা কুঁজী সুগন্ধ চন্দনে ॥
 মুক্তাহার শোভে তার কুঁজের উপর !
 শ্রীরামের বনবাসে প্রফুল্ল অন্তর ॥
 এতেক প্রমাদ হবে কুঁজী নাহি জানে ।
 ভরতের নিকট আসিল হৃষ্টমনে ॥
 হেনকালে শক্রপে সন্তাষি দ্বারী বলে ।
 এই কুঁজী হেতু রাজা মরিল অকালে ॥

এই কুঁজী মজাইল অযোধ্যানগরী ।
 এই কুঁজী মরিলে সকল দুঃখে তরি ॥
 শক্রপ্ন বলেন ভাই ! ইচ্ছা করে মন ।
 এখনি কুঁজীর আমি বধিব জীবন ॥
 শক্রপ্ন কুপিত হয়ে ধরে তার চুলে ।
 চুলে ধরি কুঁজীরে সে ফেলে ভূমিতলে ॥
 ছিঁড়িয়া লয়ে যায় তাহারে ভূতলে ।
 কুমারের চাক হেন ঘুরাইয়া ফেলে ॥
 মরি মরি বলে কুঁজী পরিত্রাহি ডাকে ।
 চুল ছিঁড়ি গেল, সে কৈকেয়ী-ঘরে চোকে ॥
 কুঁজী বলে, কৈকেয়ি ! করহ পরিত্রাণ ।
 ভরত শক্রপ্ন মোর লইল পরাণ ॥
 শক্রপ্ন প্রবেশে ক্রোধে কৈকেয়ীর ঘরে ।
 চুল ধরি কুঁজীরে সে আনিল বাহিরে ॥
 তবু তার হার আছে কুঁজের শোভন ।
 ছিঁড়িয়া পড়িল যেন দীপ্ত তারাগণ ॥
 তোর লাগি পিতা মরে ভাই বনবাসী ।
 সৃষ্টিনাশ করিলি হইয়া তুই দাসী ॥
 চুল ধরি লয়ে যায় কুঁজে যায় ছড় ।
 শক্রপ্নে দেখিয়া কৈকেয়ী দিল রড় ॥
 চেড়ীরে মারিল পাছে প্রহারে আমায় ।
 এই ত্রাস মনে করি কৈকেয়ী পলায় ॥
 শক্রপ্ন বলেন শুন কৈকেয়ী বিমাতা ।
 পলাইয়া নাহি যাও কহি এক কথা ॥
 সাত শত রাণী জিনি তোমার প্রতাপ ।
 তুমি যা বলিতে তাই করিতেন বাপ ॥
 রাজার মহিষী তুমি রাজার নন্দিনী ।
 তোমা সম ছুঁর্ভগা স্ত্রী না দেখি না শুনি ॥
 শচীর অধিক সুখ বলে সর্বলোকে ।
 আমি কি মারিয়া মাতা ! ডুবিব নরকে ॥

দাসীর কথায় বুদ্ধি গেল রসাতল ।
 দোষ অমুরূপ আমি কি বলিব ফল ॥
 যদি তোমা বধি প্রাণে দুঃখ নাহি ঘুচে ।
 মাতৃবধ করিয়া নরকে ডুবি পাচে ॥
 তোমার চেড়ীরে মারি তোমার সন্মুখে ।
 জলিয়া পুড়িয়া যেন মর এই শোকে ॥
 চুলে ধরি চেড়ীর মাটিতে মুখ ঘষে ।
 দেখিয়া কৈকেয়ী দেবী কাঁপিছে তরাসে ॥
 বৃকে হাঁটু দিয়া সে কুঁজীর ধরে গলা ।
 মুদগরের ঘায়ে ভাজিল পায়ের নলা ॥
 একে ত কুৎসিতা কুঁজী তায় হৈল খোঁড়া ।
 সর্ব্বগায়ে ছড় গেল যেন রক্তবোড়া ॥
 অচেতন হৈল কুঁজী শ্বাস মাত্র আছে ।
 ভরত ভাবেন নারীহত্যা হয় পাছে ॥
 বারে বারে ভরত বলেন সুবচন ।
 নারীহত্যা হয় পাছে শুন রে শক্রপ্ন ॥
 রক্ত-চর্ম্ম নাহি আর অস্থিমাত্র সার ।
 নারীবধ হয় পাছে না মারিও আর ॥
 নারীহত্যা মহাপাপ শুনহ শক্রপ্ন ।
 যদি এই পাপে রাম করেন বর্জন ॥
 মাতৃহত্যা নাহি করি জীরামের ডরে ।
 এত শুনি শক্রপ্ন সে ছাড়িল কুঁজীরে ॥
 লইলেন কুঁজীরে কৈকেয়ী বিচুমান ।
 এতেক প্রহারে তার রহিল পরাণ ॥
 ভরত বলেন, ভাই ! দেব সব জানে ।
 এতেক হইবে ভাই জানিবে কেমনে ॥
 রামেরে দিলেন পিতা রাজসিংহাসন ।
 কে জানে করিবে মাতা অশ্রুপাচরণ ?
 সংসারের ভোগ ভুঞ্জি তবু নাহি আট্টে ।
 রাজার মহিষী কি চেড়ীর বাক্যে খাটে ॥

আমি ছুঁই হইলাম জননীর দোষে ।
 কোঁশল্যার কাছে যাব কেমন সাহসে ?
 শক্রুল বলেন, তিনি না করিবে রোষ ।
 আপনি জানেন মাতা যার যত দোষ ॥
 ভরত শক্রুল হেথা করেন রোদন ।
 কোঁশল্যা বসিয়া ঘরে করেন শ্রবণ ॥
 ভরত শক্রুল গিয়া ভাই দুইজন ।
 করিলেন কোঁশল্যার চরণ বন্দন ॥
 পুত্র বলি কোঁশল্যা ভরতে নিল কোলে ।
 উভয়ের সর্বাক্রম তিতিল নেত্রজলে ॥
 কোঁশল্যা কহেন শুন কৈকেয়ীন্দন ।
 মায়ে পোয়ে রাজ্য কর তোমরা এখন ॥
 কালি রাজা হবে রাম আজি অধিবাস ।
 হেনকালে তব মাতা দিল বনবাস ॥
 হরিল কাহার ধন রাম কার নারী ?
 কোন্ দোষে পুত্রে মোর করে দেশাস্তরী ॥
 আমারে করিয়া দূর ঘূচাও এ কাঁটা ।
 পাঠাও রামের কাছে শিরে ধরি জটা ॥
 দুঃখভাগী যেই জন সেই পায় দুখ ।
 মায়ে পোয়ে তোমরা করহ রাজ্যসুখ ॥
 কাতর ভরত অতি কোঁশল্যার বোলে ।
 রামের সেবক আমি তুমি জানি ভাল ॥
 মম মতে যদি রাম গিয়াছেন বনে ।
 দিব্য করি মাতা ! আমি তোমার চরণে ॥
 রাজা যদি প্রজ্ঞা পীড়ে না করে পালন ।
 আমারে করুন বিধি সে পাপভাজন ॥
 প্রজ্ঞা হস্মে রাজদ্রোহ করে সেই লোকে ।
 সেই পাপে পাপী হয়ে ডুবিব নরকে ॥
 বিছা পেয়ে গুরুকে যে না করে সেবন ।
 কৰ্ম করি দক্ষিণা না দেয় যেই জন ॥

আপনা বাথানে যেবা পরনিন্দা করে ।
 সেই মহাপাপরাশি ঘটুক আমারে ॥
 স্থাপ্যধন হরণেতে যে হয় পাতক ।
 তত পাপে পাপী হয়ে ডুঞ্জিব নরক ॥
 রামেরে বঞ্চিয়া রাজ্য আমি যদি চাই ।
 ইহপরকাল নষ্ট শিবের দোহাই ॥
 শপথ করেন এত ভরত তখন ।
 কোঁশল্যা বলেন পুত্র ! জানি তব মন ॥
 রামের হৃদয় ধর্ম্মে যেমন তৎপর ।
 তোমার হৃদয় পুত্র ! একই সোসর ॥
 চৌদ্দবর্ষ গেলে রাম আসিবেন দেশ ।
 তত দিন মম প্রাণ হইবে নিঃশেষ ॥
 যতদেহ আছে ঘরে বড় পাই লাজ ।
 শীঘ্র কর ভরত ! পিতার অগ্নি-কাজ ॥
 পিতৃশোক ভ্রাতৃশোক মায়ের অযশ ।
 ভরত করেন খেদ রজনী-দিবস ॥
 আমা হেতু পিতা মরে ভ্রাতা বনবাসী ।
 এতেক জানিলে কি দেশেতে আমি আসি ?
 বশিষ্ঠ বলেন, তুমি ভরত ! পশুিত ।
 তোমারে বুঝাব কত এ নহে উচিত ॥
 সত্য পালি ভূপতি গেলেন স্বর্গবাস ।
 কাঁদিলে তাহার জন্ম হবে ধর্ম্মনাশ ॥
 রাম হেন পুত্র যার গুণের নিধান ।
 কে বলে মরিল রাজা, আছে বিজ্ঞমান ॥
 এইরূপে বুঝান বশিষ্ঠ মহামুনি ।
 ভরত না কহে কিছু কহে খেদ-বাণী ॥
 কিরূপে ধরিব প্রাণ পিতার মরণে ?
 কিরূপে ধরিব প্রাণ রামের বিহনে ?
 কিরূপে হইব স্থির কাহারে নিরখি ?
 এত শোকে প্রাণ রহে কোথাও না দেখি ॥

শশধর যেমন হইল মেঘাচ্ছন্ন ।
 বিবর্ণ ভরত অতি তেমনি বিষন্ন ॥
 পাত্র মিত্র সহিত বশিষ্ঠ পুরোহিত ।
 পিতার নিবাসে যান ভরত বেষ্টিত ॥
 সাত শত রাণী তারা শোকেতে নিরাশ ।
 ভরতের সঙ্গে গেল রাজার নিবাস ॥
 ভরত বলেন, পিতা ! এই তব গতি ।
 উঠি সন্তাষণ কর ভরতের প্রতি ॥
 তোমারে দেখিতে আসিয়াছে পুরজন ।
 উঠিয়া সবারে কহ প্রবেধ-বচন ॥
 মাতৃদোষে আমি সহ না কহ বচন ।
 যদি থাকে অপরাধ কর বিমোচন ॥
 বশিষ্ঠ বলেন, ত্যজ ভরত ! ক্রন্দন ।
 পিতৃ-অগ্নিকার্য্য শ্রদ্ধ করহ তর্পণ ॥
 পিতৃকার্য্যে জ্যেষ্ঠ তনয়ের অধিকার ।
 রাম দেশে নাহি তুমি করহ সংকার ॥
 অগুরু চন্দন-কাষ্ঠ আনে ভারে ভারে ॥
 ঘৃত মধু কুন্ত পুরি আনিল সত্তরে ॥
 মুকুতা প্রবাল আনে বহুমূল্য ধন ।
 চতুর্দোল আনিল বিচিত্র সিংহাসন ॥
 সুগন্ধি পুষ্পের মাল্য গন্ধ মনোহর ।
 চতুর্দোলে চড়াইল রাজারে সত্তর ॥
 অযোধ্যানগরে যত স্ত্রীপুরুষ আছে ।
 শিরে হাত দিয়া যায় ভরতের পাছে ॥
 মহারাজ আছিলেন তৈলের ভিতরে ।
 লয়ে যায় বন্ধু প্রজা সরযুর তীরে ॥
 তাঁরে স্নান করাইল সরযুর জলে ।
 দেখিয়া কাতর অতি হইল সকলে ॥
 স্তম্ভ বস্ত্র পরাইল সুন্দর উত্তরী ।
 সর্বাঙ্গ ভরিয়া দিল সুগন্ধি কস্তুরী ॥

নানাবিধ কুশুমের মাল্য মনোহর ।
 যথাস্থানে দিল তাঁর গলার উপর ॥
 চিতার উপর ল'য়ে করায় শয়ন ।
 নিম্নে উর্ধ্ব কাষ্ঠ দিল অগুরু চন্দন ॥
 তিন লক্ষ ধেনু দান করেন ভরত ।
 রাজার সম্মুখে আনি যথা শাস্ত্র মত ॥
 পিতারে করেন দাহ ঘৃতের অনলে ।
 করিলেন তর্পণাদি সরযুর জলে ॥
 তর্পণ করিয়া পিণ্ড দিয়া নদী-পাড়ে ।
 ভরত মূর্ছিত হয়ে মৃত্তিকাতে পড়ে ॥
 ভরত বলেন, সবে যাহ নিজ দেশ ।
 চিতার অগ্নিতে আমি করিব প্রবেশ ॥
 পিতা পরলোকগত, ভ্রাতা গেল বনে ।
 দেশেতে যাইব আমি কোন্ প্রয়োজনে ?
 বশিষ্ঠ বলেন হে ভরত ! যুক্তি নয় ।
 জন্মিলে মরণ আছে এ কথা নিশ্চয় ॥
 মরণকে এড়াইতে না পারে সংসার ।
 মরিলে সবার জন্ম হয় আরবার ॥
 সকলে মরেন, কেহ নহে ত অমর ।
 সংবরিয়া ক্রন্দন ভরত ! চল ঘর ॥
 শূণ্ণরূপা আছে অত অযোধ্যানগরী ।
 ভরতেরে নিলেন বশিষ্ঠ রাজপুরী ॥
 কান্দিয়া ভরত পোহাইগেন রজনী ।
 বিলাপ করেন সদা কোথা রঘুমনি ॥
 ত্রয়োদশ দিবসে করেন শ্রাদ্ধদান ।
 নানা দান করেন সে শাস্ত্রের বিধান ॥
 তুরঙ্গ মাতঙ্গ আর পুরী ভূমি গ্রাম ।
 বিবিধ বসন শাল আর শালগ্রাম ॥
 বিশ্রে দান করে সোনা সাত লক্ষ তোলা ।
 ধেনু দান করিলেন সোনার মেখলা ॥

ত্রি-অশীতি লক্ষ মণ সোনার ভাণ্ডার ।
 বিতরণ করিলেন ধন নাহি আর ॥
 অষ্টাশীতি লক্ষ ধেনু করিলেন দান ।
 পৃথিবীতে দাতা নাহি ভারত সমান ॥
 যত যত রাজা হৈল চন্দ্র-সূর্য্য-কূলে ।
 হেন দান কেহ কোথা না করে ভূতলে ॥
 সমাপ্ত হইল শ্রাদ্ধ নিবারিল দান ।
 পাত্র মিত্র কহে গিয়া ভারতের স্থান ॥
 আসমুদ্র রাজ্য আর অযোধ্যানগরী ।
 দিয়া রাজা তোমারে গেলেন স্বর্গপুরী ॥
 পিতৃদত্ত রাজ্য তুমি ছাড় কি কারণ ?
 রাজা হয়ে কল্প-তুমি প্রজার পালন ॥
 তোমা বিনে রাজকর্ম্ম অণ্ডে নাহি সাজে ।
 তুমি রাজা না হইলে পিতৃরাজ্য মজে ॥
 ভারত বলেন, পাত্র ! না বলিও আর ।
 জ্যেষ্ঠ সত্ত্বৈ কনিষ্ঠের নাহি অধিকার ॥
 রাজা হয়ে আমি যদি-বসি রাজপাটে ।
 মায়ের যতেক দোষ আমাতে সে ঘটে ॥
 রাজ্যের প্রকৃত রাজা রামচন্দ্র ভাই ।
 রামেরে করিব রাজা চল তথা যাই ॥
 যত অভিষেক-দ্রব্য লহ রাজ্যখণ্ড ।
 তথা গিয়া রামেরে অর্পিব ছত্রদণ্ড ॥
 রামে রাজা করিয়া পাঠাই নিজ দেশে ।
 রামের বদলে আমি যাব বনবাসে ॥
 ঘোড়া হাতী রথ চলে সাজায়ে সারথি ।
 ভারত আনিতে রামে যায় শীঘ্রগতি ॥
 দাস-দাসী চলিল রাজার যত নারী ।
 ছোট বড় সকল চলিল অন্তঃপুরী ॥
 শ্রীরামে আনিতে যায় সকল কটক ।
 বাল-বৃদ্ধ কেহ কার না মানে আটক ॥

অনন্ত সামন্ত চলে রুদ্ধ সেনাপতি ।
 ভারতের মতে চলে বহু রথ রথী ॥
 কৌশল্যা সুমিত্রা যায় উভয় সতিনী ।
 আর সবে চলিল রাজার যত রাণী ॥
 বর্শাধারি করিয়া যতেক মূনিগণ ।
 রাজ্যশুদ্ধ চলিল সকল পুরীজন ॥
 কৈকেয়ী না যান মাত্র ভারতের ডরে ।
 কুটলা কুঞ্জীর সহ রহিলেন ঘরে ॥
 কত দূর গিয়া পথে হইল গিয়ান ।
 বলিলেন বশিষ্ঠ ভারত-বিচ্যমান ॥
 যত্ন করি আপনি বিধাতা যদি আসে ।
 রামেরে আনিতে তবু না পারিবে দেশে ॥
 রামেরে আনিতে কেন করিলে উদ্যোগ ?
 না পারিবে আনিতে কেবল ছুঃখভোগ ॥
 পিতৃসত্য পালিতে গেলেন রাম বন ।
 পিতা দিল রাজ্য তুমি ছাড় কি কারণ ?
 ভারত বলেন, মুনি ! তুমি পুরোহিত ।
 পুরোহিত হয়ে কেন করহ অহিত ?
 তোমার চরণে মোর শত নমস্কার ।
 হেন অমঙ্গল বাক্য না কহিও আর ॥
 রামের চরণ বিনা গতি নাহি আর ।
 রামেরে আনিয়া আমি দিব রাজ্যাগার ॥
 প্রবোধিয়া ভারতেরে না পারে রাখিতে ।
 শ্রীরাম স্মরিয়া যান ভারত স্বরিতে ॥
 আছেন যমুনা-পারে রাম বনবাসে ।
 ভারত গেলেন তথা শৃঙ্গবের দেশে ॥
 পৃথিবী জুড়িয়া ঠাট এক চাপে যায় ।
 গঙ্গাতীরে বসি গুহ করে অভিপ্রায় ॥
 কোন রাজা আইসে সমর করিবারে ।
 আপনার ঠাট গুহ এক ঠাই করে ॥

চিনিলেক বিলম্বে সে অযোধ্যার ঠাট ।
 নিজের কটকে গুহ আগুলিল বাট ॥
 গুহ বলে দেখি ভরতের সেনাগণ ।
 শ্রীরামের সহিত করিতে আসে রণ ॥
 পরাইয়া বাকল সে পাঠাইল বনে ।
 রাজ্যখণ্ড নিল তবু ক্ষমা নাহি মানে ॥
 সাজ রে চণ্ডাল ঠাট চাপে দিয়া চাড়া ।
 বিষম শরতে মুই কাটি হাতী ঘোড়া ॥
 সর্বসৈন্য কাটিয়া করিব ভূমিগত ।
 দেশে বাহুড়িয়া যেন না যায় ভরত ॥
 মার মার বলিয়া দগড়ে দিল কাঠি ।
 হেনকালে গুহ বলে ভরতেরে ভেটি ॥
 শুন রে চণ্ডালগণ ব্যস্ত হও নাই ।
 আসিয়াছে ভরত রামের ছোট ভাই ॥
 দধি দুগ্ধ ঘৃত মধু কলসী কলসী ।
 অমৃত সমান ফল আন রাশি রাশি ॥
 নারিকেল গুবাক কদলি আত্র আর ।
 দ্রাক্ষা-ফল পনস আনহ ভাবে ভার ॥
 ভাল মৎস্য আন সবে রোহিত চিতল ।
 শিরে বোঝা স্কন্ধে ভার বহ রে সকল ॥
 যতপি ভরত করে শ্রীরামেরে রাজ্য ।
 ভালমতে কর তবে ভরতেরে পূজা ॥
 ভরত আসিয়া থাকে শত্রুভাবে যদি ।
 ভরতের ঠাট কাটি বহাইব নদী ॥
 সাত পাঁচ গুহক ভাবিছে মনে মন ।
 হেনকালে সুমন্ত্র কহেন সুবচন ;—
 আইলেন শ্রীরামেরে লইতে ভরত ।
 বল গুহ ! শ্রীরাম গেলেন কোন্ পথ ?
 গুহ বলে হেথা দেখা না পাবে ভরত ।
 শ্রীরাম লক্ষণ সীতা বহুদূরগত ॥

ভরতেরে তবে গুহ নত করি মাথা ।
 ভেট দিয়া সমাদরে কহে সব কথা ॥
 গুহ বলে ঠাট তব বনের ভিতরে ।
 আঞ্জা কর থাকুক অতিথি ব্যবহারে ॥
 ভরত বলেন ঠাট আছে অনশন ।
 যাবৎ রামের সনে নহে দরশন ॥
 যৌদেখি গঙ্গার ঢেউ পড়িছ প্রমাদে ।
 তুমি যদি পার কর যাই নিরাপদে ॥
 গুহ বলে আমার কটক পথ জানে ।
 কটক সহিত আমি যাই তব সনে ॥
 তোমার বচনে আমি না পাই প্রতীত ।
 মনে তোলপাড় করি দেখি বিপরীত ॥
 কোন্ রূপ ধরি এলে ভাই দরশনে ।
 সাজন কটক দেখি ভয় হয় মনে ॥
 ভরত বলেন মন না জ্ঞান আমার ।
 রামের চরণ বিনা গতি নাহি আর ॥
 রাম বিনা রাজত্ব লইতে অশ্বে নারে ।
 রাজ্যসহ আসিলাম রামে লইবারে ॥
 গুহ বলে ধন্যবাদ তোমারে আমার ।
 তব যশ ঘৃষিবেক সকল সংসার ॥
 তোমা হেন ধন্য ভাই রঘুনাথ মিত্র ।
 রঘুবংশ ধন্য তুমি করিলে পবিত্র ॥
 ভরত বলেন শুন চণ্ডালের রাজা ।
 কত দিন শ্রীরামের করিলে হে পূজা ?
 আমি তুষ্ট হইলাম জননীর দোষে ।
 বল গুহ ! শ্রীরাম গেলেন কোন্ দেশে ?
 গুহ বলে এখানে ছিলেন ছই রাত্রি ।
 ছই রাত্রি এক ঠাই ছিলাম সংহতি ॥
 লক্ষণ রামের ভক্ত সেবে রাত্র দিনে ।
 ধনুঃশর হাতে করি থাকে সর্বক্ষণে ॥

সুমন্ত্রে বিদায় দিয়া চিন্তিলেন মনে ।
 হেথা ভারতের হাত এড়ান কেমনে ?
 হেথা হতে যাই আমি অত্র কোন্ স্থলে ।
 ভারত না দেখা পাবে সেখানে থাকিলে ॥
 এই পথে তাঁহারা গেলেন মহাবনে ।
 গঙ্গাপার করিয়া রাখিলু তিন জনে ॥
 গুহ স্থানে পাইয়া সকল সমাচার ।
 সেই পথে গমন হইল সবাকার ॥
 তাহা এড়ি ভারত কতক দূরে গেলে ।
 তৃণশয্যা দেখিলেন এক বৃক্ষতলে ॥
 তত্পরি গুইলেন রাম বনবাসী ।
 তৃণ-লগ্ন আছে পট্ট-কাপড়ের দশী ॥
 কাপড়ের দশীতে স্থলিত আভরণ ।
 ঝিকিমিকি করে যেন সূর্যের কিরণ ॥
 তাহা দেখি ভারত চিন্তেন সকাতরে ।
 কেমনে গুইলা প্রভু খড়ের উপরে ?
 কেমনে লক্ষণ ছিল কেমনে জানকী ?
 চিনিলাম আভরণ করে ঝিকিমিকি ॥
 আছাড় খাইয়া পড়ে ভারত ভূতলে ।
 সুমন্ত্র ধরিয়া তারে লইলেক কোলে ॥
 ভারত দারুণ শোকে হইল অজ্ঞান ।
 ভারতের ক্রন্দনেতে বিদরে পাষণ ॥
 অনেক প্রবোধবাক্যে উঠেন ভারত ।
 শ্রীরামের শোকে ছুঃখ পান অবিরত ॥
 অশ্ব হস্তী পদাতিক সাত শত রাণী ।
 উপবাসে সেইখানে বঞ্চিল রজনী ॥
 প্রভাতে ভারত যান মহাকোলাহলে ।
 কটক সমেত রহে জাহ্নবীর কূলে ॥
 গুহক চণ্ডাল আছে ভারতের সঙ্গে ।
 নৌকা আনি পার করে গঙ্গার তরণে ॥

বহু কোটি নৌকার গুহক অধিপতি ।
 আনাইয়া তরণী ছাইল ভাগীরথী ॥
 তরণী-মাছুষে গঙ্গা পূর্ণ দুই কূলে ।
 হইল কটক গঙ্গা পার একতিলে ॥
 হইল সামস্ত সৈন্য শীঘ্র নদী পার ।
 তার পর ঘোড়া হাতী কটক অপার ॥
 সাজান নৌকায় পার হন যত রাণী ।
 পরে পার হইলেক সাত অক্ষৌহিণী ॥
 গুহ বলে, আমার সেখানে নাহি কার্য্য ।
 বিদায় করহ আমি যাই নিজ রাজ্য ॥
 ফিরিয়া যখন দেশে করিবে গমন ।
 আমারে আপন জ্ঞানে করিও স্মরণ ॥
 ভারত বলেন, গুহ শ্রীরামের মিত !
 করিতে তোমার পূজা আমার উচিত ॥
 যারে কোল দিয়েছেন আপনি শ্রীরাম ।
 তাঁহারে উচিত হয় করিতে প্রণাম ॥
 আপনি ভারত তাঁরে দেন আলিঙ্গন ।
 সুগন্ধি চন্দন দেন বহুমূল্য ধন ॥
 প্রসাদ পাইয়া গুহ গেল নিজ দেশে ।
 চলিলেন ভারত শ্রীরামের উদ্দেশে ॥
 মাধব তীর্থের কাছে আছে যেই পথ ।
 তাহারে দক্ষিণ করি চলেন ভারত ॥
 হস্তী হয় প্রভৃতি রাখিয়া সেই স্থানে ।
 অগ্ন লোকে গেলেন মুনির ভপোবনে ॥
 ভরদ্বাজ মহামুনি আছেন বসিয়া ।
 ভারত জানান তাঁর চরণ বন্দিয়া ॥
 আমি রাজতনয় ভারত মম নাম ।
 লক্ষণ কনিষ্ঠ মম জ্যেষ্ঠ হন রাম ॥
 রামের উদ্দেশে আমি আসিয়াছি বন ।
 কহ মুনি । কোথা তাঁর পাব দরশন ?

জিজ্ঞাসেন মুনি তাঁরে কোথা আগমন ।
 একেশ্বর আসিয়াছ না বুঝি কারণ ॥
 কটক সকল তুমি রাখিয়াছ পথে ।
 কোন্ ভাবে আসিয়াছ না পারি বুঝিতে ॥
 ভরত বলেন, আমি কপট না জানি ।
 ধ্যান করি মুনি সব জানহ আপনি ॥
 সর্বশুদ্ধ আসিলে আশ্রমে হবে ক্লেশ ।
 সে কারণে সৈন্ত মম বাহিরে অশেষ ॥
 সকল কটক মম সাত অক্ষোহিণী ।
 কোন্‌খানে রবে ঠাট ভয় করি মুনি ।
 তোমার পীড়াতে মুনি ! করি বড় ভয় ।
 তাই সব বাহিরে আছয়ে মহাশয় ॥
 রাজ্যশুদ্ধ আসিয়াছে অযোধ্যানগরী ।
 রামেরে লইয়া যাব এই বাঙা করি ॥
 অতিশয় শ্রান্ত সৈন্ত পথপরিশ্রমে ।
 কোন্‌খানে রবে ঠাট তোমার আশ্রমে ?
 ভরতের কথা শুনি আজ্ঞা দেন মুনি ।
 আপন ইচ্ছায় আন যত অক্ষোহিণী ॥
 দিব্য পুরী দিব আমি দিব্য দিব বাসা ।
 অতিথি সবায় আমি করিব জিজ্ঞাসা ॥
 ভরত বলেন, দেখি খানকত ঘর ।
 কেমনে রহিবে ঠাট কটক বিস্তর ?
 ভরতের কথাতে কহেন হাসি মুনি ।
 প্রয়োজন যত ঘর পাইবে এখনি ॥
 কটক আনিতে যান ভরত আপনি ।
 হেথা চমৎকার করে ভরদ্বাজ মুনি ॥
 যজ্ঞশালে গিয়া মুনি ধ্যান করি বৈসে ।
 যখন যাহারে ডাকে তখন সে আসে ॥
 বিশ্বকর্মা প্রথমতঃ হয় আগুয়ান ।
 আশ্রম অপূর্ব পুরী করিতে নিৰ্ম্মাণ ॥

মুনি বলে, বিশ্বকর্মা ! শুনহ বচন ।
 নিৰ্ম্মাণ করহ যেন মহেন্দ্র-ভবন ॥
 অশীতি যোজন করে পুরীর পত্তন ।
 সোনার আবাস-ঘর করিল গঠন ॥
 সোনার প্রাচীর আর সোনার আয়ারী ।
 সোনার বাঙ্কিল ঘাট দীঘি সারি সারি ॥
 পুরীর ভিতর করে দিব্য সরোবর ।
 শ্বেতপদ্ম নীলপদ্ম শোভে নিরন্তর ॥
 সুবর্ণ-পালঙ্ক করে রত্ন-সিংহাসন ।
 দেবকণ্ঠা লয়ে ঠাট করিবে শয়ন ॥
 করিল সোনার বাঁটা সোনার ডাবর ।
 কস্তুরী কুম্ভম রাখে গন্ধ মনোহর ॥
 যত যত নদী আছে পৃথিবীমণ্ডলে ।
 যোগবলে আনাইল মুনি সেই স্থলে ॥
 সাত শত নদী আর নদ যত ছিল ।
 সেখানে প্রভাস আদি যমুনা আসিল ॥
 আসিল নন্দী নদী কৃষ্ণা গোদাবরী ।
 আসিল ভৈরব সিন্ধু গোমতী কাবেরী ॥
 সরযু তনয়া নদী আর মহানদ ।
 তর্পণে যাহার জলে পায় মোক্ষপদ ॥
 কালিন্দী পুষ্কর নদী আসিল গণ্ডকী ।
 শ্বেতগঙ্গা স্বর্গগঙ্গা আসিল কোশিকী ॥
 ইক্ষুরস নদী এল সুগন্ধি সুস্বাদ ।
 মধুরস নদী এল ঘুচে অবসাদ ॥
 দধি ছন্ধ ঘৃত আদি রহে চারিভিতে ।
 যুতনদী বহিয়া আসিল শুধু ঘৃতে ॥
 সাত শত নদী তথা অতি বেগবতী ।
 আসিলেন আশ্রমে আপনি ভাগীরথী ॥
 ভরদ্বাজ ঠাকুরের তপস্যা বিশাল ।
 আসিলেন সর্বদেব দশদিকপাল ॥

দেবকছা লইয়া আসিল পুরন্দরে ।
 যে কছার রূপেতে পৃথিবী আলো করে ॥
 হেমকুট দেখি যেন সুর্য্যের কিরণ ।
 থাকুক অছোর কথা ভুলে মুনিগণ ॥
 আসিলেন কুবের ধনের অধিকারী ।
 সোনার বাসন খালে আলো করে পুরী ॥
 সুমেরু পর্বত হ'তে আসিল পবন ।
 মলয়ের বায়ুতে সবার হরে মন ॥
 আসিলেন সুধাকর সুধার নিধান ।
 পরম কোঁতুকে সবে করে সুধাপান ॥
 আসিলেন অগ্নি আর জলের ঈশ্বর ।
 শনি আদি নব গ্রহ সজে দিবাকর ॥
 মরুদগণ বসুগণ কেবা কোথা রয় ।
 আসিল সকল দেব মুনির আলায় ॥
 তুমুরু নারদ আদি স্বর্গের গায়ক ।
 আসিল নর্তকী কত কত বা নর্তক ॥
 দেবতুল্য হইল যে ইন্দ্রের নগরী ।
 ভরদ্বাজ-আশ্রম হইল স্বর্গপুরী ॥
 হেনকালে সৈন্যসহ ভরত আইসে ।
 এতেক করিল মুনি চক্ষুর নিমিষে ॥
 নিরখিয়া ভরতের লাগিল বিস্ময় ।
 তখন মন্ত্ৰণা করে স্বর্গে দেবচয় ॥
 ভরতের সজে যদি রাম যান দেশে ।
 দেবগণ মুনিগণ মরিবেন ক্রেশে ॥
 রাম দেশে গেলে নাহি মরিবে রাবণ ।
 সাধুলোক সকলের নিতান্ত মরণ ॥
 যেক্রপে না যান রাম অযোধ্যাভূবন ।
 তেমন করহ যুক্তি মরুক রাবণ ॥
 দেবগণ মুনিগণ করেন মন্ত্ৰণা ।
 ভূবনমণ্ডল ঘেরে রহে সর্বজন ॥

যার যোগ্য যে আবাস যায় সেই জন ।
 যে দিকে যে চাহে তার তাহে রহে মন ॥
 মাখিয়া সুগন্ধি তৈল স্নান করিবারে ।
 কেহ যায় নদীতে কেহ বা সরোবরে ॥
 কোন পুরুষেতে গঙ্গা যে জন না দেখে ।
 করে স্নান তর্পণ সে পরম কোঁতুকে ॥
 হস্তী হয় কটক চলিল সুবিস্তর ।
 জলকেলি করে সবে গিয়া সরোবর ॥
 ভরদ্বাজ মুনির কি অপূর্ব প্রভাব ।
 কত নদী আশ্রমে আপনি আবির্ভাব ॥
 স্নান করি পরে সবে বিচিত্র বসন ।
 সর্ব্বাঙ্গে লেপিয়া দিল সুগন্ধি চন্দন ॥
 বহুবিধ পরিচ্ছদ পরে সৈন্যগণ ।
 যার যাতে বাসনা পরিল আভরণ ॥
 সবার সমান বেশ সমান ভূষণ ।
 কেবা প্রভু কেবা দাস নাহি নিরূপণ ॥
 ভোজনে বসিল সৈন্য অতি পরিপাটী ।
 স্বর্গপীঠ স্বর্গখাল স্বর্গময় বাটী ॥
 স্বর্গের ডাবর আর স্বর্গময় ঝারি ।
 স্বর্গময় ঘরেতে বসিল সারি সারি ॥
 দেবকছা অন্ন দেয় সৈন্যগণ খায় ।
 কে পরিবেশন করে জানিতে না পায় ॥
 নির্মল কোমল অন্ন যেন যুথিফুল ।
 খাইল বাঞ্জন কিন্তু মনে হৈল ভুল ॥
 যত দধি ছফ মধু মধুর পায়স ।
 নানাবিধ মিষ্টান্ন খাইল নানা রস ॥
 চর্ব্বা চব্য লেহু পেয় সুগন্ধি সুস্বাদ ।
 যত পায় তত খায় নাহি অবসাদ ॥
 কণ্ঠাবধি পেট হৈল বুক পাছে কাটে ।
 আচমন করি ঠাট কষ্টে উঠে খাটে ॥

খাটে গিয়া প্রিয়া লয়ে করিল শয়ন ।
 দেবীরা আসিয়া করে শরীর-মর্দন ॥
 মন্দ মন্দ গন্ধবহ বহে সুসলিত ।
 কোকিল পঞ্চম স্বরে গায় কুহু-গীত ॥
 মধুকর মধুকরী ঝঙ্কারে কাননে ।
 অঙ্গরারা নৃত্য করে মাতিয়া মদনে ॥
 অনন্ত সামন্ত সৈন্য লইয়া রমণী ।
 পরম আনন্দে বঞ্চে বসন্ত-রজনী ॥
 সবে বলে দেশে যাই হেন সাধ নাই ।
 অনায়াসে স্বর্গ মোরা পাইলু হেথাই ॥
 এই সুখ এ সংসারে কেহ নাহি করে ।
 যে যায় সে যাক আমি না যাইব ঘরে ॥
 এত সুখ ঠাট করে ভরত না জানে ।
 রামের চরণ বিনা অশ্রু নাহি জানে ॥
 এতেক করেন মুনি ভরত কারণ ।
 ভরত ভাবেন মাত্র রামের চরণ ॥
 প্রভাতে ভরত গিয়া মুনিরে জিজ্ঞাসে ।
 ছিলাম পরম সুখে তোমার নিবাসে ॥
 কহ মুনি ! কোথা গেলে পাইব শ্রীরাম ?
 উপদেশ কহিয়া পুরাও মনস্কাম ॥
 মুনি বলে জানিলাম ভরত ! তোমারে ।
 তব তুল্য ভক্ত আমি না দেখি সংসারে ॥
 বর মাগ ভরত ! আমি হে ভরদ্বাজ ।
 যারে যেই বর দিই সিদ্ধ হয় কাজ ॥
 ভরত বলেন মুনি ! অশ্রু নাহি মন ।
 বর দেহ শ্রীরামের পাই দরশন ॥
 মুনি বলে শ্রীরামের জানি সবিশেষ ।
 দেখা পাবে কিন্তু রাম না যাবেন দেশ ॥
 চিত্রকূট পর্বতে আছেন রঘুবীর ।
 তথা গেলে দেখা হবে এই জেনো স্থির ॥

অশ্রু অশ্রু মুনিগণ দিল তাহে সায় ।
 ভরতের সৈন্যগণ চিত্রকূটে যায় ॥
 দশদিক্ হইল ধূলায় অন্ধকার ।
 হইল ভরত-সৈন্য যমুনার পার ॥
 রামের সন্ধান পেয়ে প্রফুল্ল কটক ।
 বায়ুবেগে চলে সবে না মানে আটক ॥
 যত হয় চিত্রকূট পর্বত নিকট ।
 তত তথাকার লোক ভাবে বিকট ॥
 চিত্রকূট-পর্বতনিবাসী মুনিগণ ।
 শ্রীরামের সহবাসে সদা হৃষ্ট-মন ॥
 সৈন্য-কোলাহল শুনি সভয় অন্তরে ।
 রক্ষা কর রামচন্দ্র ! বলে উচ্চৈঃস্বরে ॥
 হেনকালে ভরত শক্রপু উপনীত ।
 সবার তপস্বিবেশ অযোধ্যা সহিত ॥
 শ্রীরাম লক্ষ্মণ আর জনকের বালা ।
 বসতি করেন নির্মাটীয়া পর্ণশালা ॥
 তার দ্বারে বসিয়া আছেন রঘুবীর ।
 জানকী তাহার মধ্যে লক্ষ্মণ বাহির ॥
 হেনকালে ভরত শক্রপু দীনবেশে ।
 শ্রীরামের আশ্রমেতে যাইয়া প্রবেশে ॥
 গলবস্ত্র ভরত নয়নে বহে নীর ।
 পথ-পর্যটনে অতি মলিন শরীর ॥
 পড়িলেন শ্রীরামের চরণকমলে ।
 আনন্দে শ্রীরাম তাঁরে লইলেন কোলে ॥
 পরস্পর সম্ভাষণ করে সর্বজন ।
 ষথাযোগ্য আলিঙ্গন পাদাদি বন্দন ॥
 ভরত কহেন, ধরি রামের চরণ ।
 কার বাক্যে রাজ্য ছাড়ি বনে আগমন ?
 বামা জাতি স্বভাবতঃ বামা-বুদ্ধি ধরে ।
 তার বাক্যে কে কোথা গিয়াছে দেশান্তরে ?

অপরাধ ক্ষমা কর চল প্রভু ! দেশ ।
 সিংহাসনে বসিয়া ঘৃচাও মনঃক্ৰেশ ॥
 অযোধ্যাভূষণ তুমি অযোধ্যার সার ।
 তোমা বিনা অযোধ্যা দিবসে অন্ধকার ॥
 চল প্রভু ! অযোধ্যায় লহ রাজ্যভার ।
 দাসবৎ কৰ্ম করি আজ্ঞা অমুসার ॥
 শ্রীরাম বলেন তুমি ভরত ! পণ্ডিত !
 না বুঝিয়া কেন বল এ নহে উচিত ॥
 মিথ্যা অমুযোগ কেন কর বিমাতার ।
 বনে আসিলাম আমি আজ্ঞায় পিতাব ॥
 চতুর্দশ বৎসর পালিয়া পিতৃবাক্য ।
 অযোধ্যা যাঁইব আমি দেখিবে প্রত্যক্ষ ॥
 থাকুক সে সব কথা শুনিব সকল ।
 বলহ ভরত ! আগে পিতার কুশল ॥
 বশিষ্ঠ কহেন রাম ! না কহিলে নয় ।
 স্বর্গবাসে গিয়াছেন রাজা মহাশয় ॥
 শুনি মূচ্ছাগত রাম জানকী লক্ষণ ।
 ভূমিতে লুটিয়া বহু করেন রোদন ॥
 বশিষ্ঠ বলেন রাম ! ব্যবস্থা ইহাতে ।
 তিন দিন তোমার অশোচ শাস্ত্রমতে ॥
 পিতৃশ্রদ্ধ করিতে জ্যেষ্ঠের অধিকার ।
 তিন দিন গেলে শ্রদ্ধ করিবে রাজার ॥
 সকল ভাণ্ডার আছে ভরতের সাথে ।
 লহ ধন কর ব্যয় প্রয়োজনমতে ॥
 সংবর সংবর শোক রাম মহামতি ।
 তোমা বুঝাইতে পারে আছে কোন্ কৃতী ?
 সত্য হেতু ভূপতিংগেলেন স্বর্গবাস ।
 রোদন করিয়া কেন পুণ্য কর নাশ ?
 ছিলেন তৈলের মধ্যে মৃত মহারাজ ।
 ভরত আসিয়া করিলেন অগ্নিকাজ ॥

আরো যে কতব্য কৰ্ম করিয়া ভরত ।
 কত শত দান করিলেন অবিরত ॥
 তাঁহার দানের কথা শুনি পরিপাটি ।
 একে এক ব্রাহ্মণে দেন ধন এক কোটি ॥
 যতযত রাজা হইলেন চরাচরে ।
 ভরত সমান দান কেহ নাহি করে ॥
 শ্রীরাম বলেন, হে বশিষ্ঠ পুরোহিত ।
 আজ্ঞা কর পিতৃশ্রদ্ধ করি যে বিহিত ॥
 শ্রীরাম লক্ষণ সীতা চলেন ত্বরিত ।
 হইলেন ফল্গুনদী তীরে উপনীত ॥
 সকলে সলিলে স্নান করিল তখন ।
 করিলেন নাম গোত্র লইয়া তর্পণ ॥
 স্নান করি তীরেতে বসেন তিন জন ।
 তখন বসিল সবে আশ্রবন্ধুগণ ॥
 যথা রাম তথা হয় অযোধ্যানগরী ।
 রামচন্দ্রে বেড়িয়া বসিল সব পুরী ॥
 শ্রীরাম বলেন, মুনি ! জিজ্ঞাসি কারণ ।
 আয় সত্রে পিতা মরিলেন কি কারণ ?
 অমৃত বৎসর লোক সূর্য্যবংশে জীয়ে ।
 কাল পূর্ণ না হইতে মৃত্যু কি লাগিয়ে ?
 বশিষ্ঠ বলেন, রাজা গিয়া পরলোকে ।
 রক্ষা পাইলেন রাম ! তোমা পুত্র-শোকে ॥
 স্মরণ কহিল গিয়া তুমি গেলে বন ।
 হা রাম বলিয়া রাজা ত্যজিল জীবন ॥
 পিতৃকথা শুনিয়া কান্দেন তিন জন ।
 এ দিকে শ্রাদ্ধের জব্য হয় আয়োজন ॥
 তপোবনে ছিলেন যতেক মুনিগণ ।
 পিতৃশ্রাদ্ধে শ্রীরাম করেন নিমন্ত্রণ ॥
 পিতৃশ্রাদ্ধ করিলেন ফল্গুনদী-তীরে ।
 পিতৃপিণ্ড সমর্পণ করেন সে নীরে ॥

মুনিগণ কহে কি রাজ্যের পরিণাম ।
 তিনি পিশু দেন যিনি নিজে মোক্ষধাম ॥
 শ্রীরামেরে বলেন বশিষ্ঠ মহাশয় ;—
 ভরতের প্রতি রাম ! কি অনুজ্ঞা হয় ?
 তোমা বিনা ভরতের আর নাহি গতি ।
 বুঝিয়া ভরতে রাম ! কর অনুমতি ॥
 শ্রীরাম বলেন, মুনি ! হইলাম সুখী ।
 প্রাণের অধিক আমি ভরতেরে দেখি ॥
 ভরতে আমাতে নাহি করি অন্যভাব ।
 ভরতের রাজত্বে আমার রাজ্যলাভ ॥
 যাও ভাই ভরত ! ছরিত অযোধ্যায় ।
 মন্ত্রিগণ লয়ে রাজ্য করহ তথায় ॥
 সিংহাসন শূণ্য আছে ভয় করি মনে ।
 কোন্ শত্রু আপদ ঘটাবে কোন্ ক্ষণে ॥
 তোমায়ে জানাব কত আছ যে বিদিত ।
 বিবেচনা করিবে সর্বদা হিতাহিত ॥
 চতুর্দশ বৎসর জ্ঞানহ গতপ্রায় ।
 চারি ভাই একত্র হইব অযোধ্যায় ॥
 যোড়হাতে ভরত বলেন সবিনয় ;—
 কেমনে রাখিব রাজ্য মম কার্য্য নয় ॥
 তোমার পাছুকা দেহ করি গিয়া রাজ্য ।
 ভবে সে পারিব রাম ! পালিবারে প্রজ্ঞা ॥
 তোমার পাছুকা যদি থাকে রাম ধরে ।
 ত্রিভুবনে আমার কি করে কার ডরে ॥

শ্রীরাম বলেন, হে ভরত প্রাণাধিক ।
 পাছুকা লইয়া যাও কি কব অধিক ॥
 নন্দীগ্রামে পাট করি কর রাজ্যকার্য্য ।
 সাবধান হইয়া পালহ পিতৃরাজ্য ॥
 শ্রীরামের পাছুকা ভরত শিরে ধরে ।
 ভাবে পুলকিত অঙ্গ প্রফুল্ল অন্তরে ॥
 পাছুকা অভিষেক করিয়া তথায় ।
 চলিলেন ভরত শ্রীরামের আজ্ঞায় ॥
 যাত্রাকালে উঠে মহা ক্রন্দনের রোল ।
 কোন জন শুনিতেন না পায় কার রোল ॥
 কান্দেন কোশল্যারাগী রামে করি কোলে ।
 বসন ভিজিল তাঁর নয়নের জলে ॥
 স্মিত্রী কান্দেন কোলে করিয়া লক্ষ্মণে ।
 সকলে ক্রন্দন করে সীতার কারণে ॥
 ভরতেরে বিদায় করিয়া রঘুবীর ।
 চিত্রকূটে কিছু দিন রহিলেন স্থির ॥
 সৈন্যগণ সহিত ভরত অন্তঃপরে ।
 তিন দিনে আসিলেন অযোধ্যানগরে ॥
 বিশ্বকর্মে পাঠাইয়া দেন ভগবান্ ।
 নন্দীগ্রামে অট্টালিকা করিল নির্মাণ ॥
 রত্নসিংহাসনেতে ভরত পট্ট পাতি ।
 তত্পরি পাছুকা থুইয়া ধরে ছাতি ॥
 তার নীচে শ্রীভরত কৃষ্ণসার-চর্মে ।
 পাত্রমিত্র সহিত থাকেন রাজকর্মে ॥